



Informativni bilten Općine Trnovo

Mart, 2020.



STEĆAK

Stećak mramorni čuti govorom scena po boku,
jači od kandža kiše, povampirenja i krađe.
Njegov mjesec i sunce, što znače posmrtnе lađe,
davno su prevezli dušu, vjekuju sad u doku.

Udaljili su se od njeg i gradovi i sela.
Vidik mu stvore listopad i koze što tu brste.
Vjetar podsjeti lijeske, i one se šaptom krste.
Zmija mu kreće uz reljef, svoj reljef svije sred čela.

Zašto sam došao ovdje, kad sve već ovdje piše?
Posljednju blijedu zelen s jesenjom travom dišem.
Čuj, zvoni zrelo stablo - to lijes mi teše žuna.

Stihove što još bruje dlijetom po stećku svom stišaj,
pa, uspokojen, pusti neka ih pokrije lišaj,
lezi pod stećak stiha bez prevoznika-čuna.

Skender Kulenović



SADRŽAJ

Otvaranje zimske sezone 2019/2020.	4
Infrastrukturni projekti Općine Trnovo	6
Škola u prirodi	15
Bjelašnica	16
Društvena odgovornost	20
Naša djeca - naša budućnost	23
Općinsko vijeće Trnovo	26
Obilježavanje značajnih datuma	29
Privreda	34
Općina Trnovo	36
Život	42

KONTAKT PODACI

Trnovo 36, 71223 Delijaš
telefon 033/586-700
fax 033/586-705
opcina.trnovo@bih.net.ba
www.trnovo.ba

Ostali kontakt telefoni:
Općinsko vijeće
033/586-710

Kabinet Općinskog načelnika
033/586-704

Sekretar organa uprave
033/586-707

Služba za opću upravu, društvene djelatnosti,
boračko - invalidsku, dječiju i socijalnu zaštitu
033/586-703

Služba za civilnu zaštitu i inspekcijske poslove
033/545-550

Služba za geodetske, imovinsko – pravne poslove i
katastar nekretnina
033/586-713

Služba za urbanizam, komunalne poslove,
investicije i zaštitu čovjekove okoline
033/586-954

Služba za privredu, finansije i lokalni ekonomski
razvoj
033/586-709 i 033/586-714

Matična i protokol
033/586-702

Pravobranilaštvo Općine Trnovo
033/586-730

IMPRESSUM

Izdavač: Općina Trnovo
Godina izdanja: 2020.g.

Urednik: Ajla Mulaosmanović - Lindov
DTP: Haris Pindžo

Štampa: «SABAH PRINT» d.o.o. Ilidža

Otvaranje zimske sezone 2019/2020.

Olimpijska ljestvica Bjelašnica bila je centar regije 15. decembra 2019. godine.


Zimska sezona na olimpijskoj ljestvici Bjelašnici zvanično je otvorena uz koncert na otvorenom muzičkih zvijezda Balkana.

Brojni posjetioci uživali su uz hitove Jale i Bube, Coby, Senidah i drugih izvođača.

Ovom prilikom kratko su se obratili direktor ZOI'84 Kenan Magoda i Općinski načelnik, Ibro Berilo.

Direktor Magoda je kazao kako zimska sezona počinje s brojnim realiziranim projektima, a izdvojili su osvjetljenje staze Kolijevke koja će u okviru manifestacije "Winter Party" biti puštena u rad za noćno skijanje.

Općinski načelnik kratko se obratio prisutnima, i uz riječi dobrodošlice svima na olimpijsku ljestvici posebno je pozdravio i poželio dobar provod mladim ljudima, zbog čijeg velikog prisustva je sretan.



Otvaranje zimske sezone 2019/2020.



Infrastrukturni projekti Općine Trnovo

Asfaltiranje dionice puta Šabići - Sinanovići

Završeno je asfaltiranje jedne dionice puta Šabići- Sinanovići u mjesnoj zajednici Šabići, općine Trnovo. Sredstva obezbeđuje Direkcija za puteve KS, a izvođač radova je kompanija AGI d.o.o. iz Konjica. Ovo je putni pravac gdje se u posljednje vrijeme značajno povećava frekvencija saobraćaja. Okončana je prva faza projekta, a na proljeće nas očekuje nastavak radova.



Rekonstrukcija puta Bijele vode - Šabići

Ugovore o izvođenju radova sanacije, rekonstrukcije i zaštite puta Bijele Vode- Šabići, potpisao je direktor Direkcije za puteve Kantona Sarajevo Selimir Kovač sa predstavnicima firmi izvođača radova "Orman" d.o.o i Grakop d.o.o Kiseljak Bedrijom Hadžić i Senadom Sejdićem. Kako je naveo direktor Kovač, zamijenit će se kompletna kolovozna konstrukcija na ovoj dionici puta i izgraditi potporni zidovi na mjestima gdje je potrebno. Planirana je također obnova saobraćajne signalizacije.

Predstavnici firmi "Orman" d.o.o i "Grakop" ovom prilikom naglasili su da će se radovi izvršavati prema utvrđenom dinamičkom planu te da će biti okončani u ugovorenom roku. Ukupna vrijednost radova za ovu dionicu puta iznosi 671.600 KM, a finansira ih Ministarstvo saobraćaja KS putem Direkcije.

Ugovor o izvođenju radova sanacije, rekonstrukcije i zaštite dionice puta Bijele Vode- Šabići, potpisala je i Općina Trnovo sa firmom MGBH u iznosu od 300.000 KM.



Asfaltiranje lokalnih puteva u MZ Šabići i izgradnja trafostanice

U toku 2019. godine asfaltirani su putevi u naseljenim mjestima Bobovica, Lukavac, Rakitnica, Brda, Milišići i dionica puta od naselja Rašanovići prema Ivanovom polju. Sredstva su obezbeđena od strane Ministarstva privrede (sredstva OKFŠ-a) i Ministarstva saobraćaja Kantona Sarajevo.

Izgrađena trafostanica i niskonaponska mreža u naselju Šakote.

Pušten u funkciju novoizgrađeni most u Delijašima

Završeni su radovi na izgradnji novog mosta preko Crne rijeke u Bašcima na cesti M18.1, dionica Ustikolina-Trnovo. Rušenje postojećeg i izgradnja novog mosta sa pristupnim saobraćajnicama u ovoj mjesnoj zajednici započela je još početkom protekle godine. Finansijer mosta pod Bašcima, poznatiji kao most Sastavci, je JP Ceste Federacije BiH, a izvođač radova je konzorcij MGBH d.o.o. Sarajevo i EURO-ASFALT d.o.o. IPSA INSTITUT d.o.o. nadzire radove na izgradnji novog mosta u Delijašima.

Novi armirano – betonski most sa dvije saobraćajne trake i pješačkim stazama je pušten u funkciju. Njegovom izgradnjom je poboljšana saobraćajna komunikacija u ovom dijelu općine, posebno je značajan za stanovnike koji tu žive.

“Most je jedan od kapitalnih zahvata za ovu godinu u mjesnoj zajednici Delijaš. Ne samo po finansijskoj vrijednosti, nego i po tome što će most pored svoje upotrebine važnosti za saobraćaj na magistralnom putu imati i estetsku vrijednost. Zadovoljni smo dinamikom realizacije projekata u ovoj mjesnoj zajednici”, rekao je Općinski načelnik.



Završeno uređenje centra mjesne zajednice Delijaš

Završeno je uređenje centra mjesne zajednice Delijaš, čime je centralno naselje Pomenovići dobilo potpuno novi izgled. Izgrađene su i popločane pješačke staze, rješen saobraćaj u mirovanju, zatim odvodnja oborinskih voda, te hortikulturno uređen prostor. Vrijednost projekta i radovi koji su izvedeni iznose 279.717,76 KM, a izvođač je kompanija Mevludin Commerc d.o.o. iz Sarajeva. Projektom je obuhvaćen prostor oko centralnog dijela u naselju, tačnije ulica koja vodi od džamije i centralnog spomen obilježja u Pomenovićima pa do novoizgrađenog, renoviranog objekta – Dom kulture. Taj prostor je oduvijek bio mesto okupljanja građana. Zaleđe ovih objekata je šuma za odmor u vrelim ljetnjim danima, kao i teren za igre loptom i dječije igralište.



Modernizacija magistralnog puta M18.1. Ustikolina Garež, poddionica Azilantski centar-Garež

Općina Trnovo i JP Ceste Federacije BiH finansirali su projekat modernizacije magistralnog puta M 18.1. Ustikolina-Garež, poddionica Azilantski centar – Garež. Cilj je da se osigura adekvatna cestovna infrastruktura i poboljšanje elemenata ceste, stabilnosti i povećanje sigurnosti saobraćaja. Predmetna magistralna cesta ovom rekonstrukcijom će biti proširena, te će se riješiti oborinska odvodnja. Zemljani radovi su se odvijali na cijeloj dionici, a paralelno sa izvođenjem zemljanih radova vrši se i zaštita okosa u visokim usjecima. Vrijednost Ugovora za izgradnju je 498.835,04 KM sa PDV-om. Izvođač radova je MGBH d.o.o.



Asfaltiranje lokalnih puteva u MZ Delijaš

Asfaltirani su lokalni putevi u naseljenim mjestima Durakovići, Slavljevići, Balbašići i Delijaš. Izvođači radova su GP Ing d.o.o i Braća Mujić Export - Import d.o.o iz Sarajeva. Radovi se finansiraju sredstvima Ministarstva privrede (sredstva OKFŠ-a) i Ministarstva saobraćaja Kantona Sarajevo.



Izgradnja lokalnih vodovoda

Realiziran je projekat izgradnje vodovoda Javorov do – Proskok – Jelšin bor. Finansijer je Općina Trnovo, a radove izvodi JKP Trnovo d.o.o. Projektom se obezbijeđuju dodatne količine vode za piće za naseljena mjesta Ostojići, Šabanci, Klanac, Obla brda, Prečani, Rahovići i Umčani. Iz JKP "Trnovo" ističu da je završena i druga dionica cjevovoda kao i betoniranje šahtova i rasteretne komore R-K1.



Završena izgradnja kanalizacije Lukavac- Šabići

Projekat izgradnje kanalizacije Lukavac- Šabići je završen. Radove izvodila kompanija BUJICE d.o.o. Konjic. Ovim projektom obuhvaćena su naselja Lukavac i Šabići koja će od sada biti priključena na javni sistem odvodnje, a fekalne vode direktno će prihvati novozgrađeni kanalizacijski sistem. Investitori projekta su Ured za koordinaciju projekta-PCU pri Federalnom ministarstvu poljoprivrede, vodoprivrede i šumarstva i Općina Trnovo. Izvedeni su pripremni, zemljani, betonski i montažerski radovi.



Započeti radovi na kanalizaciji od naselja Trebečaj prema Gračanici nisu završeni u cijelosti zbog neriješenih imovinsko - pravnih odnosa.

Izgradnja spomen česme u Trnovu

Općina Trnovo finansirala je izgradnju spomen česme šehidima mjesne zajednice Trnovo. Kompanija CENTAR-HAN d.o.o. započela je sa betonskim radovima u sklopu projekta izgradnje spomen česme šehidima i civilnim žrtvama rata.

“Zasigurno je da će pored svoje prvobitne namjene ovakva spomen česma uljepšati ovaj centralni prostor naseljenog mjesta Trnovo. Projekti Općine se nastavljaju iz dana u dan i svakako da će se u narednom periodu vidjeti napredak istih. Uz aktivnosti i angažman svih nas ne sumnjam da ćemo u kontinuitetu i dalje ići progresivnim putem” – rekao je Općinski načelnik Ibro Berilo.

Izgradnjom spomen-česme, dvorište zgrade Općine Trnovo i već od ranije izgrađeno centralno spomen obilježje sa ispisanim imenima će biti dodatno uljepšano i upotpuniti će ambijent. Spomenik je podignut u znak sjećanja hrabrim borcima koji su ono najvrijednije za odbranu svoje zemlje-svoje živote. On predstavlja simbol stradanja stanovnika Trnova, a s druge strane voda sa česme predstavljat će simbol života i neprestane borbe.



Asfaltiranje puteva u mjesnoj zajednici Trnovo

Radovi na sanaciji i asfaltiranju putnog pravca Rajske do – Turovi – Godinja te putnog pravca Trnovo – Deseci – Trebečaj su završeni. Za izvođenje ovih radova sredstva je obezbjedilo Ministarstvo privrede (sredstva OKFŠ-a) i Ministarstvo saobraćaja Kantona Sarajevo. Pojedini dijelovi ovih puteva i ulica su bili u dosta lošem stanju. Kolovozna konstrukcija na više mjesta oštećena i dotrajala, na šta veliki uticaj ima slabo riješena odvodnja. Izvođač radova je kompanija GP Ing i Braća Mujić Export-Import d.o.o. Paralelno sa ovim radovima, isti izvođači radova angažirani su i na uređenju i asfaltiranju nekoliko pristupnih puteva u naselju Trnovo, opštine Trnovo.



Sanacija puta u naseljenom mjestu Pendići

Na dionici regionalnog puta, koji prolazi kroz naseljeno mjesto Pendići firma „Grakop“ izvodi radove na sanaciji. Radi se o izgradnji prema elementima regionalnog puta, i povezat će M18 sa regionalnim putem Krupac- Bjelašnica. Biće sanirano oko 800 metara puta. Radovi se odvijaju planiranom dinamikom. Sanacija podrazumijeva asfaltiranje puta, uređenje kosina, tretman oborinskih voda, izradu podrigolske drenaže i sanaciju propusta. Radovi se finansiraju sredstvima Direkcije za puteve Kantona Sarajevo. Nadzor nad izvođenjem radova vrši Zavod za izgradnju Kantona Sarajevo.



Asfaltiranje u MZ Dejčići

U MZ Dejčići asfaltiran je dio puta prema Straištu u dužini od 203 m, sa zajedničkim učešćem građana ove mjesne zajednice i Općine.

Asfaltiran je centar naselja Ostojići i put od Ostojića prema naselju Omenik. Sredstva za ovaj projekta su obezbjedili Direkcija za puteve Kantona Sarajevo i Ministarstvo saobraćaja Kantona Sarajevo.



Ostojići

Obnova mezarja

Kada su u pitanju ograde na mezarjima u općini Trnovo u prethodnoj godini obnovljena su mezarja u Durakovićima i Ostojićima, koji su zajednički projekti građana i Općine.



Straišta

Potpisan Ugovor o izgradnji infrastrukture u obuhvatu Poslovno-sportskog centra



U prostorijama Općine Trnovo potpisani je Ugovor o izgradnji infrastrukture u obuhvatu Poslovno-sportskog centra Trnovo, na Bjelašnici. Potpisnici su Općinski načelnik i lider konzorcija, direktor kompanije Almy – Transport, gospodin Jasmin Kalabić. Konzorcij čini firma Almy- Transport iz Zenice i Dolovi Sokolac d.o.o. Ukupna vrijednost Ugovora, sa uраčunatim PDV-om, iznosi 3.688.663,53 KM. Riječ je o radovima na izgradnji saobraćajnice sa parkingom, zatim izgradnji vodovodne mreže, kišne i fekalne kanalizacione mreže.

Rok izvođenja radova je 24 (dvadesetčetiri) mjeseca od uvođenja u posao. Podsjećamo prema projektu, Poslovno- sportski centar Trnovo ima funkciju centra za trenažni program profesionalnih sportista, a sastojat će se od otvorenih sportskih terena i građevina koje će biti dostupne građanima. Poslovno- sportski centar će biti napravljen na površini od 11,21 hektara, s desne strane na ulazu u zonu Babinog dola, na nadmorskoj visini od blizu 1.300 metara.

Održana javna rasprava za centralni vodovodni sistem za napajanje mjesne zajednice Trnovo

Predstavnici izrade projekta, uposlenici nadležne službe za urbanizam i komunalne poslove općine Trnovo, te građani mjesne zajednice Trnovo prisustvovali su prezentaciji projekta centralnog vodovodnog sistema za snabdijevanje mjesne zajednice Trnovo. Pomenuti vodozahvat planiran je na 1125 metara nadmorske visine. Vodom će se snabdijevati naselja: Godinja, Trebečaj, Brutusi, Gračanica, Pendići i Trnovo (FBiH). Prema planiranom projektu do naselja Godinja vodila bi se dva cjevovoda, te bi ovo naselje dobilo novi rezervoar, dok bi drugi cjevovod napajao ostala naselja.



Nova sredstva za završetak izgradnje podzemne garaže

Ministarstvo saobraćaja Kantona Sarajevo je preko Direkcije za puteve obezbijedilo sredstva za završetak sanacije ceste od ulaza u Babin Do do kružnog toka pored Hotela Maršal na Bjelašnici. Obezbeđena su sredstva u iznosu od 445.000 KM.

Potpisan je i Aneks Sporazuma o dopuni sporazuma kojim je sufinansirana realizacija projekta izgradnje podzemne garaže sa 100 mjesta na Babinom dolu. Ministarstvo saobraćaja je obezbijedilo dodatna sredstva od 200.000 KM kako bi garaža bila završena do početka zimske sezone. Ove sporazume su potpisali ministar saobraćaja Kantona Sarajevo Adnan Šteta i načelnik Općine Trnovo Ibro Berilo.



Potpisan sporazum o relizaciji projekta izgradnje i rekonstrukcije javne rasvjete

Pomoćnik Općinskog načelnika Osman Smiječanin i Ministar komunalne privrede i infrastrukture KS Srđan Mandić potpisali su Sporazum o realizaciji projekta izgradnje i rekonstrukcije javne rasvjete na području Općine Trnovo – Babin do. Ovo ministarstvo kontinuirano ima dobru saradnju sa općinom Trnovo.



Nova LED rasvjeta na Babinom dolu

Ministarstvo komunalne privrede i infrastrukture KS realiziralo je projekt izgradnje i rekonstrukcije javne rasvjete na području Općine Trnovo – Babin do. Oko 50 starih svjetiljki zamijenjeno je sa novim led rasvjetnim tijelima, zamijenjeno je nekoliko starih stubova i izvršeno novo kabliranje. "Ovaj projekt je izraz naše podrške razvoju cjelokupnog prostora Bjelašnice kao jednog od najatraktivnijih dijelova naše zemlje. Namjeravamo led rasvjetu postaviti i u urbane dijelove Kantona, čime bismo napravili uštede u potrošnji energije", rekao je resorni ministar Srđan Mandić. Vrijednost projekta je 110.000 KM, Ministarstvo učestvuje sa iznosom od 70.000 KM i Općina Trnovo sa 40.000 KM.

"Vlada Kantona Sarajevo izražava spremnost za podršku projektima i napredovanju područja općine Trnovo zbog čega smo zahvalni, jer razvojem Bjelašnice ne predstavljamo samo općinu Trnovo, nego i Kanton Sarajevo, a onda i BiH", kazao je općinski načelnik.



Kameni most na rijeci Bijeloj

Sarajevsko preduzeće „CENTAR-HAN“ završava radove na izgradnji pješačkog mosta u naselju Bare općine Trnovo. Napominjemo da je u toku prethodne godine na ovom djelu općine Trnovo, u čijoj neposrednoj blizini je i OŠ "Zaim Kolar", izgrađeno i spomen obilježe za šehide mjesne zajednice Dejčići sa spomen-česmom, uređenim šetnicama i klupama.



Ovaj prostor obiluje prirodnim ljepotama, izvoristima, izletištima i vrijedi za turističko područje, stoga pješački most preko rijeke Bijele, urađen od ukrasnog kamena doprinijet će još atraktivnijem izgledu pomenutog prostora. Pored pomenutog, biće urađeno farbanje konstrukcije i postavljena rasvjeta.



Planinarski dom

Uskoro će biti definisana tačna lokacija na kojoj će biti realizovan projekat Planinarskog doma. Objekat ovakvog tipa do sada nismo imali. Cilj je omogućiti okupljanja i druženja penzionera i svih ostalih građana sa prostora općine.



Planirana gradnja memorijalnog centra na Proskoku

Predstavnici boračkih udruženja imali su priliku iznijeti svoje sugestije, prijedloge i ideje za izradu projekta za izgradnju memorijalnog centra na Proskoku, općine Trnovo. Na samom početku sastanka predstavnici boračkih udruženja su istakli značaj borbe na Proskoku. Naime, ratne 1993. godine, tačnije od 10. do 31. jula, trajale su žestoke borbe u mjestu Proskok, iznad sela Dejčići. Na Proskoku je neprijatelj uz nadmoćnost tehnike i brojnost uspio pomjeriti liniju odbrane boraca Armije RBiH na potez Igmana (Veliko polje), uz velike ljudske gubitke Armije RBiH. Ipak prekomponovanjem snaga odbrane, uz pomoć novopristiglih jedinica drugih brigada, neprijatelj je zaustavljen u pokušaju stavljanja glavnog grada Bosne i Hercegovine u potpuno okruženje. Ofanzivu agresorskih jedinica je predvodio ratni zločinac Ratko Mladić, koji je na ovom mjestu izbjegao zarobljavanje od strane jedinice Armije RBiH. Ključnu ulogu u odbrani od agresora odigrali su pripadnici Prve bošnjačke brigade i 182. viteške lahke brigade. Bitka na Proskoku bila je i ostala sinonim odbrane BiH, što je razlog da se upravo na ovom mjestu izgradi memorijalni centar.

- Općina Trnovo krenula je sa realizacijom ove ideje, za mene lično je ovo projekat od velikog značaja, i svakako prvi korak i cilj jeste da se donese pravo rješenje, koje će ispuniti sve zahtjeve i želje onih koji su učestvovali u ovoj borbi, i onih koji su izgubili najmilije, jer samo tako će ovaj memorijalni centar izgledati onako kako treba i oslikavati u današnjem vremenu takvu jednu borbu, istakao je općinski načelnik.

Mjesto na kojem se planira gradnja memorijalnog centra je bogata prirodna sredina, obiluje šumom, što će svakako ostati tako, sa planiranom alejom velikana, memorijalni centar Proskok dalje će sadržavati spomen obilježje-kao centralni sadržaj, zatim muzej, spomen-sobu, amfiteatar i vještačko jezero sa pratećim sadržajima poput parkinga, restorana i slično.



Potpisan Ugovor o izvođenju radova na rekonstrukciji kuće spasa

Općina Trnovo i kompanija "Neimari" d.o.o. Sarajevo potpisali su Ugovor o izvođenju radova – rekonstrukcija kuće spasa u općini Trnovo. Ukupna vrijednost radova je 638.745,69 KM sa PDV-om, a rok za njihovo izvođenje je 24 mjeseca od dana uvođenja u posao. Ugovor su potpisali Općinski načelnik, Ibro Berilo i direktori kompanije "Neimari", gospodin Ramiz Mulaomerović i Sedžad Mizdrak. Ovo je jedan od projekata koji za cilj imaju podizanje kvalitete turističke ponude i promocije turizma na području Općine Trnovo.

U prizemnom objektu planiran je restoran, dok je potkrovле predviđeno za spavanje. Položaj u odnosu na putnu komunikaciju koja povezuje zaleđe Bjelašnice sa centrom iziskuje da se izgradi jedan ovakav kompleks. Sam naziv "Kuća spasa" govori o tome kako je zaista bila spas za mnoge prolaznike, planinare kada je nevrijeme i mećava sa jakim udarima vjetra, međutim ponajviše je koristila mještanima, jer bi pri povratku iz Sarajeva svratili ovdje sakriti



se od lošeg vremena, odmoriti i nastaviti put dalje do svog sela. Objekat će djelimično zadržati svoju prvenstvenu namjenu, teće jedna prostorija biti uređena i otvorena za građane, vatrogasce, gorsku službu spašavanja...

Postojeće izdanje Kuće spasa je oronula i nužna je kompletna rekonstrukcija.



Inače, zgrada će djelimično da zadrži svoju prvenstvenu namjenu. Jedna prostorija će biti uređena i otvorena za goste, vatrogasce, gorsku službu spašavanja... U prizemnom objektu biće restoranski dio sa mokrim čvorovima, dok je potkrovle predviđeno za spavanje.

- Ovaj objekt ima svoju istoriju, svoje vreme i treba da ga obnovimo. Sam naziv Kuća spasa govori o tome kako je u prošlosti zaista bila sklonište za mnoge prolaznike, planinare i radnike koji su se tu našli na kiši ili u snježnoj mećavi, uz snažne udare vjetra. Posebno je koristila mještanima koji su tu odmarali pri povratku iz Sarajeva u svoja sela – kaže Općinski načelnik.



Radovi na dogradnji "Škole u prirodi", koja djeluje u sastavu Osnovne škole "Zaim Kolar" u Šabićima na Bjelašnici, tridesetak kilometara od Sarajeva, su u završnoj fazi. Preostao je dio vanjskog uređenja i opremanje novog dijela objekta.

Projekt dogradnje škole finansiraju Općina Trnovo i Ministarstvo za obrazovanje, nauku i mlade Kantona Sarajevo, a implementira Općina Trnovo. Izvođač radova je firma Centar-Han. Proširivanjem kapaciteta ove škole bit će omogućen besplatan boravak za 4.000 učenika u predivnom prirodnom ambijentu, na nadmorskoj visini od 1.100 metara, i to na razmeđi tri planine: Bjelašnice, Treskavice i Visočice.



Kroz "Školu u prirodi" djeci će se omogućiti boravak na čistom zraku, u ugodnom i mirnom seoskom ambijentu, kao i upoznavanje s prirodnim i historijskim znamenitostima šireg područja Bjelašnice.

Arhitektonsko rješenje definirano je u skladu s programskim i funkcionalnim zahtjevima, mogućnostima koje nudi lokacija, te su funkcionalno primjereni modernom načinu korištenja, a prilagođeni uvjetima koji vladaju na planini. Raniji objekt se sastojao iz dvije funkcionalne sredine. Prvu cjelinu činili su edukativni dio s dvije učionice i zajedničkom prostorijom, dok je drugu cjelinu činio ugostiteljski dio s restoranom. Planirano je da nakon završetka radova ukupni smještajni kapacitet bude blizu 130 ležajeva.

Dogradnjom etaže i mansarde na postojeći objekt, "Škola u prirodi" će dobiti novu funkcionalnu cjelinu. Pored hostelskih soba, bit će proširen i ugostiteljski sadržaj (kamin sala, restoran, kuhinja). Objekt škole će tako, pored osnovnog edukativnog karaktera, imati i hostelsko-ugostiteljski, to jest turistički karakter, kakav i treba posjedovati jedna "Škola u prirodi". Prostor u okviru školskog kompleksa sadrži košarkaško, odbojkaško i nogometno igralište.



Projekti u toku

Podzemna garaža na Babinom dolu, u sklopu projekta Srebrna lisica, koju gradi Općina Trnovo zajedno sa Vladom KS, najvećim dijelom je završena. Sagrađena je konstrukcija ulaza i izlaza iz garaže. Uskoro će se raditi elektro instalacije i sprinkler postrojenje. Tender za izvođenje radova je proveden i posao je dodijeljen firmi ZZ GROS - COMP. Garaža će biti završena krajem juna, a nakon tehničkog prijema će biti i zvanično i otvorena. Kapacitet garaže je 92 parking mjesta.

Završeni su radovi na podlozi za popločavanje trga i postavljanje kišnih kanalica kao i postavljanje kamena na platou. Popločavanje trga je investicija ukupne vrijednosti, sa PDV-om 515.234,64 KM, a izvođač radova je kompanija Sela d.o.o. iz Sarajeva.

Inače, ovaj plato bit će višefunkcionalni i očekivano je da postane jedna od najatraktivnijih lokacija na Bjelašnici za sva dešavanja. Plato će biti popločan, a prostor će biti i hortikulturno riješen, na dijelovima će se zasaditi trava, drveće i ukrasne biljke.



Intenzivirani su i radovi na izgradnji puta u obuhvatu UP Bjelašnica I faza. Ovo je saobraćajnica koja će prolaziti pored pomenutog platoa, ispod hotela "Han". Postavljeni su ivičnjaci i urađen prvi asfaltni sloj dok se završetak radova očekuje na proljeće. Na ovom djelu, u sklopu novoizgrađene saobraćajnice urađena je i modernizacija rasvjete, izvršeno postavljanje novih stubova nakon čega je izvršena ugradnja LED rasvjetnih tjela.



Na Bjelašnici pošumljeno 165 hektara površine



Vodeći se principom da su "šume pluća i zeleno srce naše planete", na prostoru Općine Trnovo u proteklih deset godina pošumljeno je više od 165 hektara površine. Svijest o tome da smo ovaj planet "posudili od generacija koje dolaze", ključna je u razumijevanju važnosti očuvanja i obnove ovog iznimnog prirodnog bogatstva po kojem je naša BiH poznata u svijetu. Zato je veoma bitna činjenica da se na olimpijskim planinama poput Bjelašnice, uprkos naglašenoj želji za razvojem turističkih i

infrastrukturnih kapaciteta, kontinuirano vodi računa i o obnovi šumskog fonda i očuvanju prirode. Za svaku pretvorbu građevinskog zemljišta Općina Trnovo plaća da se zasade nove površine. Zasadi su tako napravljeni na više lokaliteta Gornje Rakitnice, Hojte-Presjenice, te Crne rijeke- Željeznice. Zasađene su kulture crnog i bjelog bora, smrče... Prema ranijim planovima KJP "Sarajevo-šume", na južnim padinama Bjelašnice tokom 20 godina bit će zasađeno oko 20 miliona sadnica, a Kanton Sarajevo time će dobiti od osam do deset novih miliona kvadratnih metara šume. Na ovaj način se pokazuje odgovornost prema prirodi i stvaraju šumska bogatstva za generacije koje dolaze. Ovakvo djelovanje lokalne vlasti i kantonalnih preduzeća treba pozdraviti, te ove aktivnosti na olimpijskim planinama dodatno intenzivirati i u budućnosti.

Amar Osim posjetio Bjelašnicu: Ovakav sportski centar treba Sarajevu

Trener Željezničara Amar Osim u oktobru mjesecu 2019. godine posjetio je Bjelašnicu gdje se susreo s načelnikom Općine Trnovo Ibrom Berilom, te upoznao o detaljima projekta izgradnje "Poslovno-sportskog centra Trnovo". Jedan od najmodernijih centara u Bosni i Hercegovini bit će izgrađen na nadmorskoj visini blizu 1.300 metara, na ulazu u Babin do.

-Postoji potreba grada Sarajeva za multifunkcionalnim sportskim centrom. Očekujem da će ovo biti sportski centar sa reprezentativnim terenima, na kojim se mogu održavati pripreme i utakmice - rekao je Osim.

U sjevernom dijelu planiranog kompleksa na Bjelašnici gradit će se nogometni teren koji će biti

pokriven prirodnom travom, te tribina od 1.000 sjedećih mjesta. Planirana je i izgradnja balon hale s vještačkom travom. Bit će napravljen i pomoći nogometni teren s prirodnom travom, te po jedno igralište za mali nogomet, rukomet, košarku i odbojku, koje će se moći koristiti i zimi. Općina Trnovo, realizira ovaj projekt, sa uvjerenjem da će najbolji domaći i regionalni evropski klubovi koristiti usluge centra, te da će se na taj način proširiti turistička ponuda.

Načelnik Berilo zahvalio je Osimu za posjetu i podršku projektima. Istakao je kako je Općina

Trnovo spremna za saradnju i finansijsku podršku za sve aktivnosti koje će doprinijeti afirmaciji kako sportskih, tako i drugih aktivnosti, a u cilju promjene ukupnog ambijenta na prostorima općine Trnovo.

Okvirni plan za završetak projekta je dvije i pol godine, a procijenjena vrijednost projekta je 16,9 miliona KM.



Općina Trnovo i KJKP Park o saradnji i održavanju

Uprava preduzeća Park, v.d. direktora Edin Abdurahmanović i v.d. izvršnog direktora održavanja Alma Bahtanović posjetili su Općinu Trnovo i s općinskim načelnikom razgovarali o održavanju javnih zelenih površina na području ove općine. Kroz redovno održavanje shodno Programu preduzeće Park na godišnjem nivou održava prostor Parka djece Srebrenice u blizini hotela Maršal na Bjelašnici. Na više od 300.000 kvadrata površine vrši se higijena na području Velikog polja na Igmanu, a održavanje na godišnjem nivou radi se i na površinama uz zgradu Općine.

Dosadašnjim radom i zalaganjem preduzeća Park generalno smo zadovoljni u Općini Trnovo, međutim njihov zahtjev je da se spisak tih lokacija izmjeni, jer smatramo da treba redovno održavati urbani prostor općine, a ne onaj koji se rjeđe posjećuje tokom ljetnog perioda. S obzirom da općina Trnovo čini, kako navode oko 26% teritorije Kantona Sarajevo, neophodno je održavati i još dunum zemljišta u tri mjesne zajednice uz spomen obilježja u Šabićima, Delijašima i Dejčićima, kao i na Igmanu, a nakon što bude uređeno od iduće godine da se redovno održava površina na Babinom dolu. Iz Općine su istakli spremnost i da za te aktivnosti tehnički obnove mehanizaciju i alat radnika Parka koji inače vrše održavanje Igmana i Bjelašnice. V.d. direktor Abdurahmanović pozdravio je spremnost predstavnika Općine da se razgovara o saradnji i problematiči održavanja, te upoznao predstavnike Općine da je u toku prikupljanje sugestija i prijedloga od lokalnih zajednica, odnosno Općina, jer je u toku priprema za izradu Programa održavanja javnih zelenih površina, kao najvećeg godišnjeg projekta Parka za 2020. godinu. Zatraženo je od Općine da se dostavi prijedlog i zahtjev o uslugama preduzeća Park za održavanje, kako bi nakon prikupljanja svih prijedloga, s Ministarstvom komunalne privrede i infrastrukture KS, odnosno KS kao osnivačem i vlasnikom Parka bilo usaglašeno koji dio površina će biti finansiran iz Budžeta KS, a koji kroz ugovore iz općinskih budžeta.



Predstavnici Općine Trnovo su raspitivali i za proceduru postavljanja korpi za sitni otpad na izletištima, odnosno na Babinom dolu i u blizini, a zaključeno je da to jedino može biti kroz investiciono ulaganje Općine. Iz Općine su insistirali i da se riješi pitanje komunalnih redara, pa i laguna za područje izletišta, posebno tokom vikenda kada je velika koncentracija izletnika na tom prostoru, odnosno kada veće količine smeća ostaju na travnjacima i pored vodotoka. Razgovaralo se i o saradnji Općine Trnovo i "Pionirske doline" kroz posjete osnovaca Trnova ovom rekreativno zabavnom centru ili kroz časove u prirodi gdje bi osnovci Trnova bili educirani i posjetili prirodne ljepote svoje općine, ali i naučili i posjetili svakog stanovnika zoološkog vrta "Pionirske doline".

Noćno skijanje

U zimskoj 2019/2020 sezoni noćno skijanje na Bjelašnici se odvijalo na dvije staze.

"Novost koja će obradovati ljubitelje noćnog skijanja na Bjelašnici jeste projekat osvjetljenja staze i trase Ski lifta Koljevka. U cilju modernizacije Ski centra na Bjelašnici, pristupa se projektu izgradnje vanjske rasvjete na stazi Koljevka na Bjelašnici. Sada ćemo pored lifta BX imati i noćno skijanje na stazi Koljevka. Na približno 920 metara staze Koljevka skijaši će ove sezone uživati u noćnom skijanju srijedom, petkom i subotom", istakli su iz firme ZOI '84. Cijena karte za noćno skijanje u sezoni 2019/2020. godine na Olimpijskoj planini Bjelašnica iznosit će 25 KM za odrasle i 15 KM za

djecu. Cijena dnevne skijaške karte bit će 35 KM za odrasle, odnosno 25 za djecu, dok će se poludnevne moći kupiti za 30, tj. 25.



Press – konferencija: Inicijativa za Bjelašnicu i Igman

Neformalna grupa građana i građanki Inicijativa za Bjelašnicu i Igman održala je konferenciju za novinare u hotelu Marriott. Predmet je strateško planiranje razvoja planina Bjelašnice i Igmana. Inicijativa za Bjelašnicu i Igman želi ukazati na potrebu daljeg razvoja i unapređenja potencijala ovih planina, te ski centra Belašnica-Igman. Od mjeseca februara 2019. do sada imali su niz aktivnosti koje su naišle na odobravanje i pozitivnu reakciju aktuelnih struktura, predsjedavajućeg Skupštine KS, ZOI'84 i Općine Trnovo. Sobzirom na sve veću zainteresovanost građana, ljubitelja planine, te medija za rad ove grupe građana predstavili su javnosti planirane aktivnosti, te ozvaničili potrebu za svakim oblikom podrške kako bi afirmativnim pristupom iskoristili sve planinske aktivnosti.

Emir Vučijak ispred ove grupe kazao je kako Inicijativa okuplja ljubitelje planina, skijaše koji godinama pokušavaju da dobiju jedan respektabilan skijaški centar.

– Na planinama stalno nešto nedostaje, ili vještako osnježavanje, ili se žalimo na kamenje na stazama, na sporost liftova. Do sada se nezadovoljstvo ljudi ispoljavalo tiho, ali smo onda odlučili da to promijenimo. Odlučili smo da se udružimo i skupa radimo na tome da Bjelašnica i Igman postanu mnogo razvijeniji nego što sada jesu. Naša namjera je da skupa radimo na poboljšanjima. Obavili smo razgovore s nadležnim iz KJP ZOI '84, KS-a i Općine Trnovo i naišli na razumijevanje. Već smo dogovorili da imamo kratkoročne mjere za poboljšanje u narednoj sezoni, naveo je Vučijak, te istakao kako žele da se stvore uslovi da bude moguće skijanje 120 dana i da staze budu odlične.

Načelnik Općine Trnovo Ibro Berilo, kazao je da Inicijativu doživljavaju kao partnere.

– Želimo da oni budu korektivni faktor u svim dobrim i lošim potezima. Želimo da kažemo da su zakonske nadležnosti jasno definisane i nećemo ulaziti tamo gdje nije naša nadležnost. Tamo gdje je nadležna Općina učiniti će maksimum za dobrobit kako građana naše općine tako i posjetioce Bjelašnice. Za razvoj zimskog sporta ne treba da ulažu ni općina ni kanton, već samo da se dobit koju ostvare ulaže tamo gdje je i ostvarena, u skijališta Bjelašnice, a ne da se tim sredstvima saniraju gubici Zetre. Općina ništa od toga ne traži. Želimo paralelno da razvijamo i ljetnu i zimsku ponudu, trenutno imamo razvijeniju ponudu za zimu, a za ljetno nemamo šta da ponudimo, mora se raditi na tome.



Aktivnosti grupe građana

Slijedeći želje i savjete skijaša, ambasadori olimpijskih planina - grupa građana Inicijativa za Bjelašnicu i Igman zajedno sa uposlenicima KJP ZOI 84 su u protekloj sezoni postavili vjetrobrane na izlaznoj stanici šestosjeda, što je samo jedna u nizu aktivnosti koje su planirane u narednom periodu s ciljem da se skijališta na Bjelašnici i Igmanu učine konkurentnijim. Organizatori naglašavaju da su u narednom periodu u planu radovi na proširenju tehničkog puta, zaštita izlazne stanice šestosjeda od vremenskih nepogoda, završetak čišćenja akumulacije i punjenja oba jezera vodom, završetak remonta vertikalnog transporta te osvjetljavanje donjeg dijela koljevke kako bi se proširili kapaciteti za noćno skijanje. "Realizacijom ovih aktivnosti cilj ne na Bjelašnica unaprijediti uslove za sve skijaše, ostvariti pretpostavke za 120 skijaških dana i tako produžiti skijašku sezonom", dodali su organizatori.

U januaru mjesecu Inicijativa za Bjelašnicu i Igman pokrenula je ideju za izgradnju dječijeg snow parka koju je podržao Grad Sarajevo na čelu sa gradonačelnikom koji je tom prilikom pozdravio ovakav vid građanskog aktivizma i obećao da će podržati projekat u okviru svojih mogućnosti. Članovi Inicijative za Bjelašnicu i Igman pozivaju sve zaljubljenike u skijanje i prirodne ljepote da redovno posjećuju prirodni biser na 20 kilometara od glavnog grada.



Izgradnja saobraćajnice hotel Maršal – Donja Grkarica

U završnoj fazi su radovi na spoju dva regionalna puta od hotela Maršal do Donje Grkarice u dužini od dva kilometra. Ostaje dio puta od 150 m kako bi se završila kompletna dionica.

Radovi na ovoj saobraćajnici započeli su još 2018. godine sa mašinskim iskopom duž planirane trase i proširenjem saobraćajnice, izvršeno je nasipanje tampona nakon čega je uslijedilo asfaltiranje nove saobraćajnice. Okončanje radova možemo očekivati u skorijem vremenu – saznajemo od izvođača radova, firme "MGBH" iz Sarajeva koja je angažovana za ovaj posao.

Pored navedenog izvršeno je proširenje puta u krivinama te je predviđeno i poboljšanje sistema odvodnje puta sa postavljanjem šahtova i slivnih rešetki.

Finansijer na ovom projektu je Direkcija za puteve Kantona Sarajevo.

Cilj izgradnje ove saobraćajnice je obezbjeđenje kružnog toka saobraćaja na Bjelašnici.



Aktivnost općine Trnovo u cilju zaštite okoliša

U aprilu 2019. godine grupa građana "Inicijativa za Bjelašnicu" i organizacije Let's Do It, ZOI 84' i Infinity organizovali su veliku akciju čišćenja olimpijske ljepotice Bjelašnice, u povodu Dana planete Zemlje. Svojim prisustvom i aktivacijom uposlenika Općine akciju je podržao i općinski načelnik Ibro Berilo, koji je izrazio zahvalnost organizatorima na odličnoj ideji.

Sakupljeno je 400 vreća smeća.



Veliki broj građana, ljubitelja prirode i skijanja pridružili su se ovoj velikoj akciji čišćenja, a nakon ekološkog uređenja, uslijedilo je i druženje učesnika u objektu ZOI 84'-Beneton uz obezbijeden ručak i osvježenje dok je "Only One Catering" obezbijedio kolačice i kanapee.


Akciju su pomogli: Winterhana, Pansion Staza, Ski savez BiH, Ambasadori olimpijskih planina, ski.ba, Klas, Oaza, Rampart i Only One Catering.

Angažman svakog posjetioca u cilju očuvanja životne sredine je od izuzetne važnosti te ovim putem želimo apelovati na građane da se na savjestan i odgovoran način odnose prema okolišu.



Upozlenici Općine učestvovali u akciji čišćenja: "Kamen manje na stazi"

Druga akcija u nizu održana u junu mjesecu. Grupa građana "Inicijativa za Bjelašnicu i Igman" u saradnji sa KJP ZOI 84' i Let's do it organizovali su akciju čišćenja olimpijske ljepotice Bjelašnice. Ovaj put je u pitanju simbolična najava ljetne sezone, a čišćenje je započelo od vrha do dna, dok je u prethodnoj akciji očišćen samo donji dio Bjelašnice jer je još uvijek bilo dosta snijega. Svojim prisustvom i aktivacijom upozlenika Općine akciju je podržao i općinski načelnik Ibro Berilo, koji je izrazio zahvalnost organizatorima na odličnoj ideji, te obezbijedio sendviče i osvježavajuće napitke za sve učesnike.



Pomoć drugim Općinama: Povratnici u Foči konačno dobili struju

Općina Trnovo sufinansirala je projekat dovođenja električne energije do udaljenog fočanskog sela Kljuna na lokalitetu Mjesne zajednice Izbišno, na radost povratnika koji su ovaj trenutak čekali godinama.

Živjeli su uz fenjere, bez televizora i frižidera, a posebno je bilo teško u ljetnom periodu kada se namirnice brzo kvarile, a posla na imanjima ima i previše. "Zimi nema mnogo rada, ali ljeti je teško jer je selo udaljeno od trgovina i skladišta za namirnice, tako da sve što uzgoje od stoke i sve što se uzme da se prehrane mora se iskoristiti za dan-dva. Ti teški dani su iza nas jer je, hvala Bogu, došla struja", kaže Asim Kečo, predsjednik MZ Izbišno. Borba za električnu energiju traje od 2012. godine kada su se prijeratni stanovnici odlučili vratiti i živjeti na svom ognjištu.



"Imamo puno razloga da se zahvalimo načelnicima općina sarajevskog kantona, Novi Grad, Centar, općinama Ilijčići, Trnovo i Kakanj koje su dale podršku", kaže Izet Spahić, predsjednik SO Foča.

Općina Trnovo osigurava dio sredstava za sanaciju i asfaltiranje puta u povratničkom naselju Kuti



Općinski načelnik Ibro Berilo je sa federalnim ministrom raseljenih osoba i izbjeglica i načelnikom općine Sokolac potpisao Sporazum o udruživanju sredstava za sanaciju i asfaltiranje putnog pravca Pećnik – Kuti u Općini Sokolac. Riječ je o putnom pravcu koji ima veliki značaj za povratničku zajednicu na ovom području. Ukupna vrijednost radova iznosi 60 hiljada KM, od čega su po 20 hiljada KM osigurali Federalno ministarstvo raseljenih osoba i izbjeglica te općine Trnovo i Sokolac.

"Projekti infrastrukture jačaju razvoj ovog kraja i svakako će biti od koristi za sve naše građane, a posebno povratnike. Općina Trnovo radi boljih uslova života i rada povratnika, te povezivanja sa administrativnim centrima prepoznala je ovaj zahtjev te učestvujemo sa trećinom sredstava. Bez putne komunikacije nema ni održivosti, a ni razvoja lokalnih zajednica", kazao je Općinski načelnik.

Sufinansiranje asfaltiranja puta u Općini Rogatica

Za naseljeno mjesto Žepa dodijeljeno je 20 hiljada konvertibilnih maraka, a sporazume o dodjeli sredstava za sufinsiranje asfaltiranja puta Brezova ravan – Vratar sa Općinskim načelnikom potpisali su predstavnici Udruženja demobilisanih boraca za podršku povratka u Istočnu Bosnu.

Prilikom susreta ovim povodom načelnik je rekao da je Općina Trnovo nakon rata bila u istoj situaciji, te trebala pomoći i podršku drugih, zbog toga želi pomoći susjednim i drugim lokalnim zajednicama u rješavanju njihovih problema.

Predsjednik Udruženja demobilisanih boraca za podršku povratka u Istočnu Bosnu, Ramo Čardaković je zahvalio Općini na doniranim sredstvima. Općina Trnovo trenutno je u dobroj finansijskoj situaciji, ali mnogo važnije od toga je njena opredijeljenost da pomaže drugima u cijeloj Bosni Hercegovini, što je za svaku pohvalu.



Općina Trnovo nastavlja pomagati susjednoj opštini

Općinski načelnik, Ibro Berilo potpisao je sporazum o dodjeli 135.988,71 KM Opštini Trnovo (RS). Općina Trnovo će ovim sporazumom sufinansirati izvođenje radova na izgradnji rezervoara Bogatići i vodovoda Spile u opštini Trnovo. Realizacija o dobrenih sredstava će se vršiti u dvije faze, od kojih jedna je planirana da se realizuje u 2019. godini, dok druga u tekućoj godini. Istog dana, načelnici dvije susjedne općine potpisali su još jedan sporazum, kojim će Općina Trnovo sufinansirati izgradnju, rekonstrukciju i

asfaltiranje lokalnih puteva u opštini Trnovo. Načelnik, Ibro Berilo je ovom prilikom naglasio da Općina Trnovo kao društveno odgovorna lokalna zajednica će pomagati onima kojima je to potrebno. Uz riječi zahvalnosti Općini Trnovo i načelniku, kao i Općinskom vijeću, načelnik Gagović (Trnovo RS) je kazao da je ovo nastavak kontinuirane veoma dobre saradnje dvije susjedne općine i da im je općina Trnovo i ranije pružala značajnu pomoć. Donirana sredstva koje nam je obezbijedila Općina Trnovo, na čemu smo zahvalni, dobro će



nam doći. Ovi planirani, sufinansirani projekti su za nas jako važni.

Održan tradicionalni turnir u malom nogometu

Općina Trnovo u organizaciji mjesne zajednice Dejčići podržava održavanje tradicionalnog turnira u malom nogometu. Na improvizovanom terenu u naselju Bare – Dejčići svoje fubalsko umijeće pokazali su mladi općine Trnovo okupljeni u ekipe. Najbolja je bila ekipa „Dejčići“, dok je drugo mjesto zauzela ekipa „Turovi“ a na trećem mjestu je druga ekipa mladih iz Dejčića „Dejčići II“. Za učesnike je obezbjeden ručak, a najboljim ekipama turnira uručne su novčane nagrade. Svakako da je ovo još jedan u nizu svjetlih primjera kojim Općina Trnovo, mjesna zajednica nastoji svoje mlado stanovništvo kroz sportske i rekreativne aktivnosti sačuvati od loših uticaja savremenog doba.



Dodijeljene stipendije Općine Trnovo za učenike i studente

Uslove koje su svi stipendisti morali ispuniti je da imaju prebivalište na području općine Trnovo te da nisu korisnici iz drugih izvora. Po navedenim kriterijima za 2018/2019. školsku i akademsku godinu pravo na stipendiju je ostvarilo 66 stipendista, od toga 22 studenata i 44 učenika srednjih škola. Prema pravilniku o stipendiranju učenika i studenata općine Trnovo, studenti tehničkog i medicinskog smjera su ostvarili stipendiju u iznosu od 120,00 KM, za studente društvenih smjerova stipendija iznosi 100,00 KM i za učenike srednjih škola 80,00 KM.



Obilazak porodica šehida

U toku mjeseca Ramazana, a povodom obilježavanja Dana šehida Općina Trnovo je obezbijedila i upriličila podjelu novčanih hedija uz prigodan bajramski paket za 59 porodica šehida sa područja općine Trnovo. Svake godine, sada već tradicionalno obiđemo sve šehidske porodice sa područja naše općine, dio njih se posjeti prilikom obilježavanja Dana Općine, a drugi dio u toku Ramazana.



-Cilj je samo jedno, a to je da se sjetimo i sve podsjetimo na žrtvu hrabrih sinova, koji su u temelje slobodne BiH, slobodnog Trnova ugradili svoje živote. Trnovski šehidi ostaju trajna opomena svima nama. Nastojimo održati dobru saradnju sa predstvincima Udruženja kako bi poznavali probleme i potrebe ove populacije, istakao je Općinski načelnik Ibro Berilo.

Naša djeca - naša budućnost

Sretno đaci prvac!

Općinski načelnik sa saradnicima posjetio je trnovsku osnovnu školu, "Zaim Kolar" u Dejčićima, i učenicima prvog razreda podijelio udžbenike i školske ruksake sa potrebnim priborom. Upriličenom prijemu za buduće prvačice prisustvovali su i njihovi drugari starijih generacija i roditelji. U svom obraćanju načelnik je đacima prvacima, punim nade i pozitivne energije poželio uspješno školovanje.

Ruksake sa školskim priborom od općine Trnovo dobili su i prvačići osnovne škole "Sveti Sava" u Trnovu RS.



Paketići za sve učenike



Općinski načelnik kazao je da mu posebno zadovoljstvo pričinjava kada vidi sretna dječija lica, jer Nove godine su za sretne oči malenih dječaka i djevojčica, one su za raširene dječije ruke pune poklona, one su za ples i pjevanje. One su da se pamte, nekad kasnije, kada se pokvarimo, kada naša srca zaborave da vole, kada zaboravimo da budemo ljudi. Djeca to najbolje znaju, biti dobri ljudi a i mi odrasli bi to makar trebali pokušati. Direktor škole, Adis Hodžić zahvalio se gostima na ovom lijepom gestu i naglasio da su djeca svojim vrijednim radom i učenjem zaslужila paketiće.

Održana 57. Smotra naučno-tehničkog stvaralaštva

Domaćin i organizator 57. Smotre naučno-tehničkog stvaralaštva za Općinu Trnovo i Hadžiće je bila JU Osnovna škola „Zaim Kolar“, iz Dejčića, a takmičenju je pristupilo 25 učenika od V do IX razreda.



Općinsko takmičenje iz predmeta tehnička kultura održano je za učenike osnovnih škola iz Trnova, Tarčina, Hadžića i Pazarića. Za učenike koji su ostvarili najbolje rezultate na ovom takmičenju Općina Trnovo obezbijedila je novčane nagrade. Takmičenju je prethodio primjereno kulturno-zabavni program a poslije vremena predviđenog za test, devetočlana komisija, koju su činili nastavnici iz gore pomenutih škola je proglašila najbolje učenike i dodijelila im diplome i novčane nagrade.



Naša djeca - naša budućnost

Održano takmičenje – upozoravanje na opasnost od mina



U našoj osnovnoj školi "Zaim Kolar" Dejčići, u novembru mjesecu održano je školsko takmičenje iz programa "Upozoravanje na opasnost od mina", u organizaciji Crvenog križa općine Trnovo. Na takmičenju su učestvovali tri ekipe učenika pod nazivima Grožđe, Jabuka i Kruška. Pobjednička ekipa je Grožđe. Svim učesnicima su uručene nagrade. Pobjednička ekipa je nakon ovoga uzela učešće na kantonalm takmičenju. A predstavljali su je učenici u sastavu: Durmo Nermina, Nejra Podgorica i Muhamed Krupalija. Takmičenje je manifestacija koja ima za cilj provjeru sposobnosti učenika osnovne škole iz oblasti znanja iz programa "Upozoravanja na opasnost od mine i zaštiti od mina i NUS-a".

Akcija darivanja krvi

Više puta u toku godine Crveni križ Trnovo u saradnji sa Zavodom za transfuzijsku medicinu Federacije BiH organizuje darivanje krvi. U ime organizatora, sekretar Ifeta Krupalija zahvalila se svim darovateljima tečnosti koja život znači. Istakla je da su ljudi prepoznali važnost darivanja krvi te da je u toj oblasti naša mala zajednica aktivna, te je zabilježen uzlazni trend.

-Posebno me raduje da mladi već s 18 godina stječu naviku darivanja krvi, a to govori o mentalnom zdravlju društva – zaključila je Krupalija. "Pored toga što ljudi čine dobro djelo, čine uslugu i svome zdravlju, jer u velikom broju slučajeva i ljekari navode kako je važno darovati krv. Krv se na taj način obnavlja", kazala je jedna od redovnih darovateljica krvi. Uz sve navedeno, važna aktivnost kojom se Crveni križ bavi jeste i pomaganje starijim i nemoćnim osobama te podizanje svijesti djece i mlađih o potrebi pomaganja socijalno ugroženima.



"Igre bez granica i razlika"

Omladinsko udruženje "Dobro djelo" je 1. oktobra u sportskoj dvorani "Ramiz Salčin" organizovalo manifestaciju "Igre bez granica i razlika". Bila je ovo prilika da mališani, korisnici usluga Omladinskog udruženja Dobro djelo, polaznici Predškolske ustanove KidlUS i Centra za slušnu i govornu rehabilitaciju pošalju jedinstvenu poruku da je djeci za sretno odrastanje potrebna ljubav, toplina, igra, ali i pravo na obrazovanje i zdravstvenu njegu.

Predstavnici predškolske ustanove IUS-a i udruženja "Dobro djelo" uručili su nekoliko zahvalnica za doprinos u njihovom radu, između ostalih i načelniku Općine Trnovo Berilo Ibri, za koga je istu preuzeo pomoćnik Esad Velić.

– Zahvalnica za nesebičnu pomoć u radu ove predškolske ustanove IUS-a i ovog udruženja mnogo znači načelniku, nažalost zbog ranije preuzetih obaveza nije u mogućnosti prisustvovati, svakako rekao je da u njegovo ime obećam dalju saradnju i podršku.



Omladinsko udruženje Dobro djelo od aprila 2015. pruža pomoći podršku djeci uzrasta od dvije do 13 godina. Stručni tim čine logopedi, defektolozi, psiholozi, pedagozi, profesori predškolskog odgoja i obrazovanja. Sve usluge su besplatne.

Naša djeca - naša budućnost

Obilježen Dan škole

24.04.2019.

Povodom Dana škole u sali Osnovne škole "Zaim Kolar" Dejčići održana je priredba. Učenici od prvog do devetog razreda pjevali su, plesali, glumili i svirali.

Na samom početku svim prisutnim obratio se direktor škole sa nekoliko riječi o prošlosti ove škole i važnosti obilježavanja Dana škole, te postignutim rezultatima škole i ovom prilikom zahvalio se Općinskom načelniku na nesebičnoj podršci školi, te istakao značaj započetog projekta škole u prirodi, odnosno područne škole u Šabićima. Direktor je zatim pozvao sve učenike koji su učestvovali na takmičenjima i postigli zavidne rezultate i još jednom im čestitao uz poklon-knjigu.

Priredbu su koordinirale učiteljice i nastavnice, a učenici i učenice ove škole su pokazali svoje raznovrsne talente.

Program bogat sadržajima, pun pjesme, recitacija, igrokaza, veselih boja i kostima oduševio je goste,



Dani Kantona Sarajevo u općini Trnovo

U sklopu manifestacije "Dani Kantona Sarajevo", od 02. – 09.05.2019. godine, organizovana su predavanja u organizaciji JU Dom zdravlja KS-OJ Trnovo.

Održano je predavanje na temu "Vakcinacija i spolno prenosive bolesti" u Osnovnoj školi "Zaim Kolar" Dejčići, za učenike osmog i devetog razreda. Predavanje je održala doktorica Amra Mehmedagić: "Edukacija mladih u sklopu obrazovnog sistema je jedan od prvih koraka u prevenciji spolnih bolesti. Važna je edukacija mladih prije stupanja u spolne odnose, dakle na početku njihovog spolnog života. Edukacija mladih treba biti usmjerena ne samo na povećavanje znanja kod mladih, nego i na pružanje podrške, te razvoj socijalnih vještina potrebnih za izbjegavanje rizičnog ponašanja, prevenciju spolno prenosivih bolesti i neželjenih trudnoća. Aktivno učešće mladih u preventivnim programima pridonosi razvoju samopoštovanja i odgovornom spolnom ponašanju" – istakla je doktorica.



Još jedna od aktivnosti u ovom povodu je predavanje za građane općine Trnovo održano u zgradi Općine. Predavanja su održana na dvije teme: Šećerna bolest (Dijabetes mellitus i komplikacije), predavač dr. Amra Mehmedagić i na temu: Hipertenzija, predavač diplomirana medicinska sestra Amina Hromo u zgradi Općine Trnovo. Ove bolesti spadaju u najčešće poremećaje u kliničkoj praksi. Medicinska sestra Amina Hromo nakon izlaganja prezentacija o prevencijama na arterijsku hipertenziju i šećernu bolest kazala je da je sigurno da su građani sve svjesniji važnosti ulaganja u svoje zdravlje, a pogotovo u prevenciju jer se ona višestruko isplati. Naime, liječenja su daleko učinkovitija ako se bolest prepozna na vrijeme, a ne kada je već u uznapredovaloj fazi.

Nakon preventivne edukacije građani i uposlenici Općine Trnovo, koji su također prisustvovali predavanju, vršili su besplatno mjerjenje šećera u krvi i krvnog pritiska.

Općinsko vijeće Trnovo

Prema dostavljenom izvještaju Stručne službe općinskog vijeća i općinskog načelnika za 2019. godinu organizovano je i održano četiri redovne sjednice Općinskog Vijeća, četiri sjednice Kolegija i 17 sjednica radnih tijela, te dvije tematske sjednice Općinskog vijeća. Usvojeno je ukupno 29 Odluka Općinskog vijeća i 12 Zaključaka.



Održane javne rasprave na Nacrt budžeta Općine i usvojen Budžet za 2020. godinu

U prostorijama Mjesnih zajednica „Dejčići“, „Šabići“, „Trnovo“ i „Delijaš“ održane su javne rasprave o Nacrtu budžeta Općine Trnovo za 2020. godinu.

Na početku javne rasprave dodatna pojašnjenja oko Nacrta budžeta Općine Trnovo za narednu godinu, koji iznosi 19.470.708,58 KM, dala je Zineta Hadžić iz Službe za finansije, privredu i lokalni ekonomski razvoj Općine Trnovo. Budžetski prihodi su planirani u visini od 19.470.708,58 KM. U strukturi rashoda tekući izdaci iznose 3.680,00 KM, a kapitalni izdaci 15.790.708,58 KM.

Pomoćnik načelnika, Osman Smječanin kazao je kako će u narednoj godini biti nastavljena realizacija započetih kapitalnih projekata poput poslovno-sportskog centra na Bjelašnici, škole u prirodi u Šabićima, najavio nekoliko većih, novih kapitalnih projekata, te spomenuo projekte poput rekonstrukcije ulica, nastavak izgradnje kanalizacije, vodosnadbijevanja, nastavak projekata javne rasvjete, sa novim LED sijalicama i slično. Općinski načelnik bio je prisutan na svakoj javnoj raspravi, odgovarao je građanima na postavljena pitanja. Istakao da pored značajnih kapitalnih projekata, u idućoj godini će biti nastavljeno izdvajanje za obrazovanje, socijalnu i boračko-invalidsku zaštitu, samozapošljavanje mladih i drugo...



U decembru mjesecu protekle godine na sjednici općinskog vijeća usvojen je Budžet općine koji iznosi 28.933.011,26 KM. Za kapitalne projekte izdvojiti će se 25.073.011,26 KM, što govori da je budžet razvojni.

Obilježen Dan državnosti BiH u Sarajevu

Polaganjem cvijeća i odavanjem počasti na spomen obilježju "Vječna vatra", mezarju "Kovači", spomen obilježju ubijenoj djeci opkoljenog Sarajeva i u spomen parku "Vraca" obilježen Dan državnosti BiH.

U obilježavanju su sudjelovali predstavnici državnih, federalnih, kantonalnih, gradskih i općinskih vlasti, zatim predstavnici boračkih udruženja i političkih stranaka, kulturnih institucija, nevladinih organizacija te brojni građani, a ono je održano u organizaciji Kantona Sarajevo. Delegacija Općine Trnovo, na čelu sa predsjedavajućom Općinskog vijeća položila je cvijeće na pomenutim spomen obilježjima i time obilježila ovaj historijski datum, koji obavezuje sve nas da se borimo za zajedništvo, zalagajući se za očuvanje državnog suvereniteta i multikulturalnosti bosanskohercegovačkog društva.



Delegacija Općine Trnovo prisustvovala je obilježavanju u Kalinoviku

Članovi porodica ubijenih i nestalih, kao i preživjeli logoraši kalinovačkih logora, obilaskom nekadašnjih logora, mesta torture i ubijanja na području općine Kalinovik, polaganjem cvijeća i prigodnim vjerskim programom obilježili su 26. godišnjicu stradanja civilnog stanovništva tog kraja. Predsjedavajuća Općinskog vijeća, Emina Mehmedagić sa delegacijom ispred organa uprave i Općinskog vijeća Trnovo odala je počast i položila cvijeće.



Sjećanje na masakr na Markalamu

Na mjesto masakra koji se prije 24 godine dogodio kod ulaza u Gradsku tržnicu Markale, u Ulici Mula Mustafe Bašeskije do broja 64.

Brojne delegacije svih nivoa vlasti, te članovi parodica i prijatelji položili su cvijeće i odali počast ubijenim sugrađanima kao i delegacija općine Trnovo na čelu sa predsjedavajućom Općinskog Vijeća.

Održana zajednička tematska sjednica općinskih vijeća Trnovo i Hadžići

U kongresnoj sali hotela "Han" na Bjelašnici održana je zajednička tematska sjednica općinskih vijeća Trnovo i Hadžića o zaštićenom području Bjelašnice, Visočice, Treskavice i kanjona Rakitnice. Govorilo se o prvcima i perspektivama ovih područja. Osim vijećnika i Općinskih načelnika sjednici su prisustvovali i predstavnici Federalnog ministarstva turizma i okoliša, Ministarstva prostornog uređenja i zaštite okoliša KS, kao i predstavnik Programa UN-a za okoliš- Kancelarija u BiH (UNEP-a).



„Drago mi je da su se naše tri općine Trnovo, Hadžići i Konjic zajedno sa resornim Federalnim ministarstvom konačno usaglasile oko definisanja granica zaštićenih područja na bazi prirodnih resursa, a ne na bazi volje načelnika općina ili predstavnika viših nivoa vlasti. Na kraju krajeva, izraditi će se studija koja će odrediti šta je to sadržaj tih zaštićenih područja, a ne nečija volja. Nadam se da smo došli do rješenja koje će p r i j e s v e g a zadovoljavati građane ove tri općine, pa građane Kantona Sarajevo i na kraju

građane FBiH. Nas ovo najviše interesuje jer se radi o 25 odsto teritorije općine Trnovo. To znači da jednu četvrtinu općine Trnovo predajemo na upravljanje FBiH kao zaštićeno područje. Važno je i da se definiše na koji način će se upravljati tim područjem, šta će se u tom području moći graditi, kako će ljudi imati pristup svome gruntu i imovini koju imaju u zaštićenom području. To su vrlo važne stvari za općinu Trnovo i mene kao načelnika općine, istako je načelnik Ibro Berilo.

Tematska sjednica Općinskog vijeća Trnovo - Nacrt Zakona o lokalnoj samoupravi

Nacrt Zakona o lokalnoj samoupravi razmatran je na jednoj od tematskih sjednica OV Trnovo, a sjednici je, kao gost, prisustvovala Ministrica pravde i uprave u Vladi Kantona Sarajevo, Lejla Brčić sa saradnicima.

Ministrica Brčić je na početku sastanka izrazila zadovoljstvo za organizovanje tematske sjednice na ovu aktuelnu temu, te zahvalila na pozivu. Izrazila je spremnost da zajedno sa svojim saradnicima učestvuje u sjednici Općinskog vijeća. Jasno je zašto načelnici općina pokazuju ovoliki stepen zainteresovanosti za donošenje zakona, te kazala da je iz zaključaka koje su ranije donijeli vidljivo da se vrlo ozbiljno pristupilo ovoj materiji.

Nakon što je saslušala uvodne stavove Općinskog načelnika na nacrt pomenutog zakona, ministrica Brčić je istakla da neće dozvoliti da Zakon o lokalnoj samoupravi bude pušten u proceduru samo "pro forme", ukoliko on neće biti provodiv, te da razumije stav općinskog načelnika u cilju da zaštiti lokalnu zajednicu, te da isti propis ne smije izazvati probleme na terenu.



Obilježavanje značajnih datuma

Obilježen Dan policije SJB Trnovo

Učenjem Jasina i odavanjem počasti na centralnom spomen obilježju u Trnovu obilježen je Dan policije SJB Trnovo. Organizator ovog obilježavanja je Udruženje boraca "Patriotska liga" općine Trnovo. Pripadnici SJB Trnovo kao borbena jedinica Trnovo u pet ratnih policijskih stanica sa 285 policajaca 35 ostalih radnika SJB Trnovo shodno planu za vanrendne prilike, neposrednu ratnu opasnost i rat, izvršavali borbena dejstva u svim akcijama. Najveće kolektivno ratno priznanje MUP-a RBiH "Ratnu zastavu" pored još samo dvije specijalne jedinice dobila je SJB Trnovo. Na današnjem obilježavanju odata je počast svim šehidima, a posebno se sjećamo pripadnika SJB Trnovo: Dedić Mirsad, Knežević Dragoljub, Bjelica Ibro, Pločo Edib, Bunar Zahid, Čosić Sakib, Drinjaković Senad, Hamzić Abid, Krupalija Zulfo, Sačić Dino, Leka Fikret, Zagorac Suada, Zagorac Edib, Malkić Hajro, Šehović Uzeir, Hodžić Rizo, Terzo Nermin, Spahija Kasim, Velić Munib, Mehanić Ismet, Zulić Sado, Mehanić Kemo, Leka Ibro, Mizdrak Zajko, Mehanić Alija i Mulaosmanović Hamza. Povodom ovog značajnog historijskog datuma, u prisustvu porodica šehida i patriota općine Trnovo delegacija ispred Općine Trnovo, delegacija ispred organizatora i udruženja boračkih udruženja općine Trnovo, delegacija ispred udruženja 1. Bošnjačke brigade, delegacija ispred Udruženja Patriotske lige KS i specijalne jedinice Bosna, te delegacija ispred općinske organizacije SDA Trnovo položili su cvijeće na spomen obilježje i odali počast šehidima, te na ovaj način pokazali da žrtva ovih ljudi nikada neće biti zaboravljena. Kratko su se obratili prisutnima gospodin Edhem Godinjak, načelnik tadašnje stanice javne bezbjednosti Trnovo i općinski načelnik Ibro Berilo.



Dani otpora Kijeva

Odavanjem počasti na spomen obilježju u mjesnom mezarju naselja Kijevo obilježena je godišnjica "Dani otpora Kijeva". Udruženje Ratnih Vojnih Invalida Općine Trnovo bilo je organizator obilježavanja godišnjice.



Učenjem Jasina-dove odata je počast svim šehidima, a posebno smo se tog dana sjetili: Adil Belko, Atif Belko, Jasmin Belko, Muhamrem Belko, Munib Belko, Belko Salem, Bajro Bičo, Hasib Bunar, Rasim Bunar, Zahid Bunar, Zijad Bunar, Osman Bunar, Almir Bunar, Jasmin Čengić, Sabit Čosić, Sakib Čosić, Ibro Demir, Jasmin Demir, Zahid Demir, Ramiz Jašar, Asif Karić, Bajro Karić, Kasim Kolar, Smajo Kolar, Abid Kolar, Zaim Kolar, Redđad Kolar, Muhamrem Kolar, Bajro Lingo, Bajro Malkić, Jusuf Malkić, Hajro Malkić, Abdulrahman Novalić, Smajo Omerbegović, Vejsil Omerbegović, Mujo Prasko, Ismet Prasko, Jusuf Šegalo, Junuz Šukur, Asif Šukurević, Izet Zolj, Zikret Zolj, Kasem Zolota, Mirzet Zulić i Sado Zulić. Njihova hrabrost i njihova žrtva su obaveza za trajno sjećanje. Kratki historijski čas održao je gospodin Šefik Karić, koji je istakao značaj obilježavanja ovakvih datuma jer svjedoči borbu građana za slobodu, koja se nikada ne smije ponoviti.

Dani odreda Šabići



Obilježavanje značajnih datuma



Obilježavanje godišnjice pogibije Keme Mehanića

U nedjelju, 16.06.2019. godine upriličeno je obilježavanje godišnjice pogibije Mehanić (Abida) Keme i njegovih saboraca. Organizator ovog obilježavanja je Udruženje jedinstvena organizacija boraca "Unija veterana" općine Trnovo prema kalendaru obilježavanja datuma i događaja od značaja za Kanton Sarajevo.

U povodu obilježavanja prisutnima se obratio Edhem Godinjak: "Kemo Mehanić bio je pripadnik 1. Bošnjačke brigade i obavljao dužnost komandira voda, posthumno mu je dodijeljeno najveće ratno priznanje Zlatni ljljan i Policijska medalja za hrabrost."

Na mjesnom mezarju u Turovima, općine Trnovo, uz prisustvo građana, bivših saboraca, predstavnika porodica šehida i pginulih boraca, ratnih vojnih invalida, kao i predstavnika lokalnih vlasti, proučena je Jasin dova, te položeno cvijeće i odata počast Mehanić Kemi i njegovim saborcima.



Dan šehida

Dan šehida, koji se tradicionalno obilježava drugog dana Bajrama, prilika je da se svi građani Bosne i Hercegovine prisjeti onih koji su položili svoje žive za svoje mjesto i zemlju u periodu od 1992-1995. godine.

Udruženja šehida i pginulih boraca općine Trnovo svake godine obilježavanje ovog značajnog datuma upriliči na centralnom spomen-obilježju Igman-Veliko polje.

Dan šehida je dan sjećanja na sve one koji su se svojom hrabrošću i plemenitošću u odbrani Bosne i Hercegovine uzdigli do najsvjetlijih primjera boraca za pravdu, istinu i dostojanstvo. O važnosti ovog datuma, te čuvanju od zaborava naših šehida govorio je efendija Abdulah Dedić. Na kraju svog izlaganja čestitao je svima Bajram, riječima Bajram Šerif Mubarek Olsun uz želje za dobro zdravlje i porodičnu sreću.

Cvijeće je položila delegacija ispred Udruženja organizacija porodica šehida i pginulih boraca općine Trnovo i delegacija ispred Općine Trnovo.



Obilježavanje značajnih datuma

Obilježavanje prvog organizovanog otpora

Obilježena je 27. godišnjica prvog organizovanog otpora podjeli BiH, pod nazivom Barikade. Organizator je Udruženje boraca "Patriotska liga" općine Trnovo zajedno sa mjesnom zajednicom Trnovo. Proučena je Jasindova, odata počast i položeno cvijeće u znak sjećanja na šehide, poginule borce i od rata umrle pripadnike Armije BiH i MUP RBiH. Program obilježavanja, centralna manifestacija se održala ispred zgrade općine Trnovo, gdje su bili prisutni pripadnici boračkih udruženja, udruženja boraca ali i brojni ostali građani i patriote koji su svojim prisustvom uveličali ovu manifestaciju. Značaj obilježavanja ovog datuma kroz kratki historijski čas istakao je gospodin Edhem Godinjak, rekavši kako nas iskustvo uči da bolje sutra neće doći bez borbe, stoga umjesto nostalгије za boljim juče, borimo se za bolje sutra, te je iskoristio ovu priliku i čestitao svim prisutnim Dan Nezavisnosti BiH. Pored delegacije šehidskih porodica, delegacije ispred boračkih udruženja općine Trnovo, općinski načelnik Ibro Berilo i predsjedavajuća općinskog vijeća Emina Mehmedagić učenjem fatihe i polaganjem cvijeća na spomen – obilježju odali su počast.



Obilježena 27. godišnjica otpora mjesne zajednice Delijaš

U organizaciji Udruženja jedinstvene organizacije boraca "Unije veterana", 16.06.2019. godine, obilježena je 27. godišnjica "Dani otpora MZ Delijaš". Obilježavanju su prisustvovali pripadnici boračkih populacija kao i mnogobrojni građani. Proučena je Jasindova, održan kratki čas historije te polaganjem cvijeća odata počast šehidima i poginulim borcima Armije RBiH. Kratko prisjećanje kroz historiju i o važnosti ovog datuma, te čuvanju od zaborava naših šehida govorio je gospodin Ismet Imamović, jedan od preživjelih heroja ovog područja i predsjednik JOB-a Unije veterana Kantona Sarajevo. Cvijeće su položile delegacije ispred Općine Trnovo, te boračkih udruženja Kantona Sarajevo i općine. Istog dana u ovom povodu upriličeno je učenje Mevluda u mjesnoj džamiji u Delijašima.



Godišnjica oslobođanja Straišta, Prečkog polja i Presjenice

U nedjelju, 07.07.2019. godine, u prisustvu porodica šehida, bivših boraca, ratnih vojnih invalida te predstavnika lokalnih vlasti obilježena je godišnjica oslobođanja Straišta, Prečkog polja i Presjenice. Braneći šire područje Dejčića poginuli su heroji koji su kada je bilo najteže, stali na branik slobode i životima odbranili Trnovo i BiH. Njihov saborac, gospodin Edhem Godinjak naglasio je važnost odbrane ovih područja, herojsku borbu pripadnika Armije i policije u odbrani stanovništva od velikih zločina. Na centralnom spomen-obilježju mjesne zajednice Dejčići proučena je Jasindova svim šehidima i umrlim borcima Armije RBiH, nakon čega su predstavnici Općine Trnovo i porodica šehida odali počast polaganjem cvijeća na spomen obilježju.



Obilježavanje značajnih datuma

Općina Trnovo obilježila godišnjicu pogibije komandanta Zaima Imamovića

Predstavnici Općine Trnovo i boračkih udruženja općine su položili cvijeće na spomen obilježje velikog patriote i komandanta Zaima Imamovića. Komandant Zaim Imamović je poginuo 1995. godine u borbi vođenoj na Rogojskoj gredi, na padinama Treskavice u okviru završnih borbi koje je vodila Armija RBiH na deblokadi, odnosno povezivanju Sarajeva i Goražda, nekoliko dana prije uspostave mira u BiH.

Imamović je za vrijeme rata bio borac i komandant 14. divizije 1. korpusa Armije RBiH. Komandovao je operacijama oslobođanja Goražda „Krug“ i „Drina“ koje su izvedene u ljetu 1992. godine kada je oslobođena kompletan teritorija općine Goražde. U borbama je ranjan više puta.

– Zaim Imamović je olicenje čovjeka, borca i primjer kako se voli i brani država, mi smo odlučili ove godine ispred Općine i Općinskog načelnika odati počast i položiti cvijeće na spomen-obilježju u Trnovu, rekao je Esad Velić pomoćnik općinskog načelnika. Imamović je rođen 22. aprila 1961. godine u podrinjskom mjestu Poratak, u općini Goražde. Posthumno je odlikovan najvišim ratnim priznanjem Armije RBiH „Zlatni ljljan“.



Obilježena godišnjica Diverzantske akcije u reonu Čakle- Proskok



Obilježena godišnjica Diverzantske akcije u reonu Čakle-Proskok, u nedjelju, 06. oktobra 2019. godine. Diverzanti-učesnici ove akcije, predstavnici Općine Trnovo na čelu sa načelnikom i predsjedavajućom Općinskog vijeća, zatim predstavnici Federalnog Ministarstva za boračka pitanja, Ministar za boračka pitanja KS sa delegacijom, predstavnici boračkih udruženja Kantona i Općine kao i brojni građani općine Trnovo okupili su se najprije na centralnom spomen obilježju na Igmanu gdje su delegacije položile cvijeće, nakon čega je protokol obilježavanja nastavljen na mjestu pobjedičke akcije na Čaklama. Program sjećanja u organizaciji Jedinstvene organizacije boraca „Unija veterana“ općine Trnovo održan je na mjestu akcije i Spomen-obilježju jednog od heroja ove akcije – Mehanić Mirsada na Čaklama. Odata je počast i položeno cvijeće od strane njegove porodice i ostalih delegacija. Kratki historijski čas, uz emotivno prisjećanje održao je gospodin Ismet Imamović jedan od učesnika ove akcije.

“Odbrana BiH – Igman 2019.”

Ovogodišnja, 19. po redu tradicionalna manifestacija “Odbrana BiH – Igman 2019”, ima za cilj da okupi preživjele učesnike odbrane iz svih krajeva BiH, koji će evocirati uspomene na teške godine borbe protiv agresora, ali i upoznati mlade generacije sa značajem ove herojske borbe – podjednako važne i za Igman, i za Sarajevo, ali i cijelu BiH. Aktivnostima 1. i 2. augusta kroz odavanje počasti, predavanja, sportska takmičenja, vjerski i kulturni program obilježava se sjećanje na šehide Igmana, Sarajeva i cijele BiH. Polaganjem cvijeća na mezaristanima na Igmanu otvorena je centralna manifestacija “Odbrana BiH – Igman 2019. godine”. Cvijeće na mezaristaru Veliko polje, pored drugih mnogobrojnih delegacija položila je i delegacija ispred Općine Trnovo.



Obilježavanje značajnih datuma

Godišnjica formiranja Prvog korpusa Armije RBiH

Postrojavanjem demobilisanih boraca Armije RBiH u Memorijalnom kompleksu Kovači obilježena je 27. godišnjica formiranja Prvog korpusa Armije RBiH.

Delegacija Općine Trnovo odala je počast i položila cvijeće. Programom obilježavanja godišnjice odata je počast šehidima i poginulim borcima i položeno cvijeće na mezaru kod Alipašine džamije te na grobljima Lav, Stadion, Sveti Josip, Sveti Marko, te je održan mimohod od Trga Prvog korpusa ARBiH do Memorijalnog centra Kovači. Takoder je održana Akademija u Amfiteatru Memorijalnog kompleksa Kovači.




Obilježena 27. godišnjica od oslobođanja Trnova

Na centralnom spomen obilježju u Trnovu, obilježena godišnjica "Oslobođanja Trnova", jedne od najznačajnijih bitki koje su se tokom protekloga rata vodile na općini Trnovo. Organizator ovog obilježavanja je Udruženje organizacija porodica šehida i poginulih boraca općine Trnovo. Mještani Trnova, ratni komandanti i bivši borci prisjetili su se ratnih dešavanja i herojske borbe pripadnika jedinica Armije RBiH i policije RBiH na oslobođanju Trnova, te hrabrih sinova koji su dali svoje živote za oslobođanje Trnova: Bratić Merim, Terzo Nermin, Ploča Nasuf, Krupalija Emin, Imamović Edhem, Hodžić Rizo, Ploča Aljo, Kolar Smajo, Smječanin Osman, Kadić Nusret, Gežo Irfan, Bajraktarević Mustafa, Krilšević Haso, Mizdrak Ekrem, Lindov Fehim, Hodžić Edin, Čusto Zaim i Rogoj Nezir. Nakon učenja Jasin-dove, govorila je predsjednica Udruženja porodica šehida i poginulih boraca općine Trnovo, gospođa Sifa Drec: "Udruženje okuplja porodice šehida od rata do danas, svi se sjećamo tih teških vremena i evo danas nakon 25 godina svako sa svojim ličnim bolom živi u današnjem vremenu za koje su živote dali naši šehidi. Oni su nas obavezali da aktivno učestvujemo u što boljem uređenju i organizaciji ove države i društva na svim nivoima. Ispunjavamo najvažniji zadatak u zajednici odgajajući našu djecu i unuke, te ih obrazujući da sami mogu kreirati i voditi društvene procese. Da budu ponosni sljedbenici onih koji su nas zadužili." Upriličen je i kratki historijski čas, koji je održao komandant Edhem Godinjak. A prisutnima je učinio čast i kratko se obratio i ministar za pitanja boraca i invalida odbrambeno- oslobodilačkog rata, gospodin Salko Bukvarević, koji je istakao da se kultura sjećanja na odbrambeno-oslobodilački rat i one ljude koji su dali svoje živote mora nastaviti. Cvijeće je položila delegacija ispred Općine Trnovo, Federalnog ministarstva za pitanja boraca i invalida odbrambeno-oslobodilačkog rata, zatim delegacija ispred boračkih udruženja općine Trnovo, delegacija ispred udruženja 1. Bošnjačke brigade i udruženja 4. Viteške motorizovane brigade. Građani i zvanice svojim prisustvom i odavanjem počasti pokazali su da žrtva ovih ljudi nikada neće biti zaboravljena.



Usaglašen obuhvat zaštićenog područja Bjelašnica – Visočica – Treskavica – Kanjon Rakitnice

Federalno ministarstvo okoliša i turizma je uz podršku Programa Ujedinjenih nacija za okoliš (UNEP) organiziralo niz sastanaka sa općinama Konjic, Trnovo i Hadžići u cilju usaglašavanja aktivnosti sa ovim lokalnim zajednicama na uspostavljanju zaštićenog područja Bjelašnica – Treskavica – Visočica – Kanjon Rakitnice. Konsultacije su se održale u toku mjeseca maja tekuće godine, a rezultirale dogovorom o konačnom obuhvatu budućeg zaštićenog područja Bjelašnica – Visočica – Treskavica – Kanjon Rakitnice, koje bi nakon provođenja zakonske procedure proglašenja zaštite obuhvatalo oko 24,000 ha na teritorijama ovih općina (oko 10.000 ha na području općine Konjic, oko 9.200 ha na području općine Trnovo i oko 4.600 ha na području općine Hadžići). Preliminarno je utvrđeno i da bi ovom prostoru bila dodijeljena treća kategorija zaštite – park prirode. Prema Zakonu o zaštiti prirode FBiH („Sl. novine FBiH“, broj: 66/13) park prirode je prostrano prirodno ili dijelom kultivirano područje kopna i/ili mora i s naglašenim pejzažnim, odgojno-obrazovnim, kulturno-istorijskim i turističko-rekreacijskim vrijednostima. U parku prirode dopuštene su privredne i druge djelatnosti i radnje kojima se ne ugrožavaju njegove bitne odlike i uloga. U lokanim zajednicama koje se nalaze na prostoru koje će obuhvatiti park prirode smatraju kako je iznimno važno da je konačno utvrđena granica zaštićenog područja, što je bio veliki kamen spoticanja u prethodnom periodu. U slučaju Trnova čak jedna četvrtina prostora ukupne površine općine ući u obuhvat zaštićenog područja, što dosta govori o opredijeljenosti te lokalne zajednice da štiti svoje prirodne ljepote. Konačno je urađeno razgraničenje između zaštićenih prostora i prostora koji će služiti ostalim namjenama i potrebama razvoja tih prostora. Iako jedna četvrtina površine općine ulazi u prostor posebnog režima zaštite, nadamo se da će i ovi prostori dati dodatni poticaj razvoju.



Energetski potencijal općine Trnovo

Općina Trnovo ima idealne uslove i veliki potencijal za razvoj energetskog sektora. Općina Trnovo je pokrenula nekoliko projekata iz oblasti energetskog sektora. Nositelj projekata je firma Elektro Trnovo, koja je osnovana prije dvije godine. Kada govorimo o djelovanju ovog preduzeća, ističemo kako je urađena studija opravdanosti izgradnje mini hidrocentrala na vodotoku Bijele i Crne rijeke. Predata je samoinicijativna ponuda prema Vladi Kantona Sarajevo za dodjelu koncesija za tri mini hidrocentrale: Hamzići, Delijaš i Jagodar. Osim izgradnje mini hidrocentrala moguća je i gradnja vjetroparkova, te postoje zainteresovani investitori. Naime, jedna privatna kompanija za proizvodnju i trgovinu električnom energijom iz Sarajeva u protekloj godini iskazala je interes za izgradnju vjetroparkova na području općine Trnovo. Nakon čega je Općinsko vijeće donijelo Odluke, kojima se daje saglasnost za dodjelu koncesija za izgradnju i saglasnost za postavljanje mjerača vjetra. Postavljeni su stubovi sa mernim instrumentima za mjerjenje pravca i brzine vjetra na Bjelašnici (Šiljak, Vrh Bjelašnice i Vlahinja). Pomenuta kompanija pokrenula je samoinicijativnu ponudu za dodjelu koncesije za izgradnju vjetroparka. Cilj je povećati prihode Općine ulaganjem u obnovljive izvore energije.



Isplata općinskih podsticaja poljoprivredi

U mjesecu septembru Općina Trnovo je objavila javni poziv za ostvarivanje prava na novčane podsticaje u poljoprivredi. Pravo na direktni novčani poticaj ostvarila su fizička i pravna lica koja imaju prebivalište na području općine Trnovo a bave se uzgojom i držanjem matičnog stada ili vode matično knjigovodstvo-uzgojno seleksijski rad (ovčarstvo i govedarstvo). Ovim javnim pozivom obuhvaćena su i nagrađena i lica koja se uspješno bave biljnom proizvodnjom. Nadležna služba zaprimila je 155 zahtjeva, od čega je 151 zahtjev pozitivno rješen. Imenovana stručna komisija je izvršila provjere navoda i prijava i obišla kandidate te na licu mjestu utvrdila navode iz prijave. Odobravanje novčanih podsticaja u poljoprivrednoj proizvodnji provodi se na način propisanim procedurama apliciranja i Uputstvima za ostvarivanje podsticaja iz 2019. godine.



Novčane poticaje za animalnu proizvodnju: pčelarstvo – ostvarilo je 23 lica, ovčarstvo 45 lica, govedarstvo 60 lica. Za vođenje matičnog knjigovodstva – uzgojno seleksijski rad pravo je ostvarilo 8 lica, dok za uspješnu biljnu proizvodnju (povrće i jagodičasto voće) nagrađeno je novčanim podsticajem 15 lica.

Općinski načelnik kazao je da će podsticaji prije svega biti usmjereni u kapitalne investicije, ali da su u obzir uzeti i potrebe i mišljenja predstavnika poljoprivrednih proizvođača. Istakao je da podsticaji ne treba da budu osnova poljoprivredne proizvodnje, već ono što i jesu – podsticaji za dalji i dodatni razvoj.



JKP "Trnovo" prvi od 10 "zdravih" javnih preduzeća u BiH

Prema istraživanju o državnim preduzećima u BiH, autora Francisca Parodi i Bobane Čegar, JKP "Trnovo" općine Trnovo je na prvom mjestu među 10 državnih preduzeća koja su "zdrava". Ovo istraživanje objavio je Međunarodni monetarni fond. Javna preduzeća jesu ona u kojima Vlada na bilo kojem nivou (općina, kanton, entitet, država) ima udio u vlasništvu od najmanje 50 posto. Ove firme čine veliki dio privrede Bosne i Hercegovine i utječu na makroekonomski rezultate, fiskalnu održivost, tržište rada i konkurentnost. Prema podacima koje su prezentirali Parodi i Čegar, u Bosni i Hercegovini danas posluje 548 javnih preduzeća, od toga ih je 313 u Federaciji BiH, a 235 u entitetu Republika Srpska. Ova preduzeća zapošljavaju 80.000 radnika, 52.500 u Federaciji BiH, 27.500 u RS-u. Što se tiče vlasničke strukture, u vlasništvu općina u Federaciji BiH jeste 156 javnih preduzeća, a u RS-u 123, kantoni su vlasnici 32 preduzeća, dok su entiteti nivoi vlasti, FBiH i RS, vlasnici 48, odnosno 49 preduzeća. No, tih 97 preduzeća na entitetском nivou u svom vlasništvu drži 87 posto ukupne imovine državnih preduzeća i zapošljavaju 58.000 ljudi. U pogledu veličine, najviše je malih preduzeća – 277, srednjih 114 i velikih 73. Lako je najviše malih i srednjih preduzeća, najveći broj radnika skoncentriran je u velikim. Ono što je posebno problematično u poslovanju javnih preduzeća jesu obaveze koje su u stalnom porastu. Poređenja radi, ukupan javni dug Bosne i Hercegovine jeste na nivou 40,5 posto GDP-a BiH, a obaveze, odnosno dugovanja državnih preduzeća jesu 26 posto GDP-a, s tim da kratkoročne obaveze čine dvije trećine ukupnih obaveza državnih preduzeća. Dugovi za porez iznose 3,9 posto GDP-a, koliko iznose i dugovi prema dobavljačima. Najviše dugova napravile su državne firme koje posluju u sektorima transport i skladištenje (48 posto ukupnih obaveza), energetika (22 posto) i rudarstvo (10 posto). No, zabrinjavajući je podatak koji su prezentirali autori analize da je samo 10 od 240 državnih preduzeća u Federaciji BiH finansijski zdravo, s druge strane, riziku je izloženo 118 preduzeća. Među "zdravim" preduzećima u FBiH jesu: JKP "Trnovo" (12 zaposlenih), Veterinarska stanica "Novi Grad" (10), JP za vodoprivrednu djelatnost "Spreča" (63), Veterinarska stanica "Čelić" (4), JKP "Komus" Gračanica (41), "Igman" Konjic (1.233), JP Vodovod i kanalizacija Kiseljak (22), "Unis Ginex" (737), JP Nacionalni park "Una" Bihać (22) i JKP "Čistoća" Čelić (19). Zaključak ove analize svodi se na to da javna preduzeća ne doprinose ekonomiji koliko bi trebala, investicije vlade kroz državna preduzeća imaju negativan povrat, pa čak i novac uložen u infrastrukturu u percepciji građana ne donosi neku ljepšu sliku.

Stanje državnih preduzeća	
	Zaposleni
1. JKP Herceg Novi (100% vlasništvo)	11
2. Veterinarska stanica "Novi Grad" (vlasništvo entet-a BiH)	10
3. JP za vodoprivrednu djelatnost "Spreča" (vlasništvo entet-a BiH)	63
4. JP vodovod i kanalizacija "Čelić" (vlasništvo entet-a BiH)	4
5. JKP "Komus" (vlasništvo entet-a BiH)	41
6. "Igman" (vlasništvo entet-a BiH)	1.233
7. JP Nacionalni park "Una" (vlasništvo entet-a BiH)	22
8. "Unis Ginex" (vlasništvo entet-a BiH)	737
9. JKP "Čistoća" (vlasništvo entet-a BiH)	19
10. JP "Čelić" (vlasništvo entet-a BiH)	10

Aktivnosti OSCE-a na području Trnova

U sklopu edukativne podrške Općini i Opštini Trnovo, Misija OSCE-a u BiH organizovala je ciklus dvodnevne edukacije na temu Razvijanje komunikacijskog Akcionog plana za promociju turističkih potencijala Trnovske regije.

Dvodnevna edukacija (23.04.-25.04.2008.) iz oblasti: poslovnog planiranja, izrade komunikacijskog plana za turistički potencijal ove regije.

Radionica je osmišljena kao napredni program obuke, zasnovan na vještinama, za uposlenike Općine i Opštine, s jedinstvenim ciljem da se razvije, iskommunicira i promovira neiskorišteni potencijal Trnovske regije. Ovo je još samo jedna od aktivnosti OSCE-a na području Trnova, koja svjedoči dugogodišnjoj dobroj saradnji dvije lokalne samouprave koje djeluju na regiji Trnovo.



Radna posjeta općini Trnovo

Predsjednik SDA, gospodin Bakir Izetbegović je boravio u jednodnevnoj radnoj posjeti općini Trnovo na poziv Općinskog načelnika Ibre Berila. Prema protokolu posjete gospodin Bakir Izetbegović položio je cvijeće na centralnom šehidskom spomen-obilježju na Igmanu, nakon čega je u kongresnoj sali hotela "Han" održana prezentacija razvojnih projekata Općine, te je delegacija obišla lokalitetete trenutne izgradnje na Bjelašnici. Općinski načelnik upoznao je prisutne s radom Općine, s budućim planovima i ciljevima, prezentirajući strategijske korake Općine i provedbu planova i projekata na ovom području. Gospodin Izetbegović pažljivo je ispratio pripremljenu prezentaciju, nakon čega je iskazao zadovoljstvo za poziv općinskoj administraciji, koja je značajno napredovala, koja realizuje ovako velike projekte, te koja je iz potpuno porušene općine nakon rata dostigla visok nivo razvoja.



Općina Trnovo, koja ima oko 2500 stanovnika, u posljednje dvije godine ima Budžet od oko 30 miliona, što ukazuje na nagli razvoj Općine. Budžet ima razvojnu i socijalnu komponentu, a Općinski načelnik kaže da se konačno primjete rezultati rada zbog čega je posebno sretan.

-Prema realizaciji naših, prvenstveno infrastrukturnih, projekata možemo tvrditi da je plan i program rada Općinskog načelnika i službi ispunjen.

«Poštovani građani hvala Vam na povjerenu koje ste mi ukazali izabравši me za načelnika Općine Trnovo.»

Radna posjeta

U radnoj posjeti općini Trnovo bili su Ministar saobraćaja Kantona Sarajevo, gospodin Adnan Šteta i direktor Direkcije za puteve, gospodin Selmir Kovač sa saradnicima.

Uvažene goste primio je Općinski načelnik Ibro Berilo sa saradnicima. Tema sastanka je razmatranje i učinak dosadašnje saradnje, te upoznavanje članova sa aktualnostima, razvojnim planovima i potrebama ove lokalne zajednice, s posebnim osvrtom na resore djelovanja Ministarstva saobraćaja i Direkcije za puteve Kantona Sarajevo. Načelnik Berilo upoznao je prisutne s projektima čija je realizacija u toku, potrebama za završetak istih, te budućim planovima u kojima značajno mjesto ima i potpora s razine Vlade Kantona. Ovim putem izrazio je svoja očekivanja da će Vlada i resorna ministarstva imati razumijevanja i pružati potporu Općini Trnovo u njenim razvojnim i drugim potrebama. Načelnik je odao priznanje gostima za uspješnu dosadašnju saradnju. Na sastanku je dogovoren sufinsiranje slijedećih projekata: putni pravac Bijele vode – Koljevka, Šabići – Sinanovići, izgradnja kružnog toka na Gornjoj Grkarici, kružni tok Babin Do–Gornja Grkarica, zaobilaznica hotel Maršal- Donja Grkarica, put u Urbanističkom projektu Bjelašnica I faza te izgradnja saobraćajnice u poslovno-sportskom centru, kao i izgradnja garaže i parkirališta. U razgovorima bilo je riječi i dogovorenje je i zimsko održavanje područja općine Trnovo; put Gornja Grkarica – Sinanovići, put Gornja Grkarica – Pendičići i put za Umoljane. Nakon održanog sastanka delegacije su se uputile u obilazak regionalne saobraćajne infrastrukture.



Poslovni susret sa privrednicima Omana

U organizaciji Privredne komore Kantona Sarajevo i Trgovinske i industrijske komore Omana održan je susret između privrednika Omana i predstavnika Općine. Naime, više respektabilnih kompanija iz Omana i predstavnika njihove Komore, izrazili su želju da ostvare kontakte i poslovnu saradnju sa kompanijama u Kantonu Sarajevo i Bosni i Hercegovini, tim povodom jučer su posjetili Općinu Trnovo. U kongresnoj sali hotela Han, na Bjelašnici, Općina je priredila kratku prezentaciju naših razvojnih projekata, te ručak za privrednike iz Omana i predstavnike Privredne komore KS.

Općinski načelnik predstavio je investicionie potencijale općine Trnovo, naglašavajući otvorenost Općine za investicije, te predstavio sve planirane urbanističke projekte, ali i projekte koji su u toku, te se ovom prilikom zahvalio i Privrednoj komori Kantona Sarajevo. U svom izlaganju dalje se zahvalio na izraženom zadovoljstvu i zainteresovanosti za produbljenje saradnje sa općinom Trnovo, koja ima za cilj otvaranje novih perspektiva i stvaranje što boljeg poslovnog okruženja. Gospodin Ahmed abdulkarim Hussain Al- hooti, predstavnik delegacije privrednika iz Omana zahvalio se Općini Trnovo na gostoprimgstvu, kazavši kako je na Bjelašnici bio prije tačno deset godina i kako je zadivljen onim što vidi danas, te na istom čestitao Općinskemu načelniku i uručio mu simbolični poklon države Oman.



Radni sastanak načelnika općina Kantona Sarajevo

Jedan od niza sastanaka na temu zakona o lokalnoj samoupravi održan je u organizaciji Općine Trnovo. Sastanku su pored načelnika općine Trnovo Ibre Berila prisustvovali načelnik Općine Iliđa Senahid Memić, načelnik Općine Hadžići Hamdo Ejubović, načelnik Općine Novo Sarajevo Nedžad Koldžo, te predstavnici općina Vogošća, Centar, Novi Grad i Stari Grad.

Zaključeno je da cijela Vlada Kantona Sarajevo treba biti uključena u usaglašavanje ovog zakona sa načelnicima općina. Načelnici su insistirali da se nastavi proces započet 2017. godine kada je formirana Radna grupa koju su činili predstavnici općina i nadležnog ministarstva, a koja je radila na usaglašavanju ovog nacrta. Zaključci te Radne grupe nisu uvršteni u novi Nacrt Zakona o LS, te je zaključeno da Ministarstvo pravde i uprave prihvati da općine putem svojih predstavnika, a to je pomenuta Radna grupa, budu uključene u izradu Nacrta, te da prijedlog Nacrta Zakona o LS ministarstvo ne upućuje na usvajanje Skupštini Kantona bez saglasnosti općinskih načelnika.



Održana sjednica Predsjedništva Skupštine Saveza općina i gradova FBiH

Na osmoj redovnoj sjednici Predsjedništva Skupštine Saveza općina i gradova Federacije BiH koja je održana u Sarajevu članovi Predsjedništva su detaljno upoznati o nizu aktivnosti koje je Savez poduzeo. Jedna od ključnih tački dnevnog reda bila je inicijativa Općine Centar Sarajevo za zaštitu prava na lokalnu samoupravu koja je povrijeđena donošenjem Uredbe o postupku prijema u radni odnos u zavodima, agencijama, direkcijama i upravnim organizacijama, pravnim osobama s javnim ovlaštenjima na teritoriju kantona, grada ili općine, u javnim ustanovama i javnim poduzećima čiji su osnivači kanton, grad ili općina, te u javnim ustanovama i javnim preduzećima u kojima kanton, grad ili općina sudjeluju s više od 50 posto ukupnog kapitala. Načelnik Općine Trnovo Ibro Berilo je naglasio da su jedinicima lokalne samouprave u Sarajevskom kantonu oduzete sve nadležnosti osim Zakona o građevinskom zemljištu, te je rekao kako općinama u Sarajevskom kantonu veći problem predstavljaju uredbe, nego zakoni. Članovi Predsjedništva zaključili su da u Sarajevskom kantonu bude pokrenuta aktivnost oko obustave primjene Uredbe, odnosno njenog stavljanja van snage i da se ispita ustavnost i usklađenost sa Zakonom o principima lokalne samouprave u FBiH svih zakonskih rješenja u KS. Također, članovima Predsjedništva su predstavljene i aktivnosti Saveza oko izrade Analize pripadnosti javnih prihoda jedinicama lokalne samouprave u FBiH, koja će poslužiti kao važeći argument za pokretanje inicijative Saveza za izmjenu Zakona o pripadnosti javnih prihoda u FBiH, na način da se poveća udio općina i gradova u raspodjeli javnih prihoda od neizravnih poreza, te prihoda od poreza na

dohodak i poreza na dobit. Navedeno je da osnovu za novu raspodjelu prihoda predstavlja činjenica da su se od 2006. godine, kada je donesen trenutni postotak raspodjele prihoda od indirektnih poreza općinama i gradovima, prihodi općina i gradova od indirektnih poreza stalno relativno umanjivani u odnosu na prihode viših razina vlasti temeljem otplate vanjskog duga FBiH, od kojeg jedinice lokalne samouprave često nisu dobivale sredstva i uživale koristi, dok su, istovremeno, rashodi općina i gradova rasli, jer su im sa viših razina vlasti prenošene nadležnosti bez prijenosa finansijskih sredstava za izvršavanje tih nadležnosti. Dogovoren je da će uslijediti potpisivanje Sporazuma o suradnji između Saveza općina i gradova FBiH sa Predstavničkim domom Parlamenta FBiH, te da će Savez kao pravni sljednik moći zastupati interese svojih članica u Parlamentu FBiH.



Duh ramazana u Trnovu

Općina Trnovo odlučila je organizirati iftarske sofre u džamijama mjesnih zajednica naše općine, kao i podjelu iftara za postače u najudaljenijim naseljima. Podijeljeno 600 iftara.

–Ramazan kao najodabraniji mjesec u godini, u njemu se dobra djela višestruko nagraduju, stoga ramazanske dane treba iskoristiti na najbolji mogući način. Mi smo u ovogodišnjoj ramzanskoj akciji nastojali da obroci koje pripremamo budu maksimalno kvalitetni i potpuni – sretni smo da smo vjernike okupili u džamijama, a onim starim i najudaljenijim stanovnicima naše Općine iftare smo dostavili na kućnu adresu, rekao je Općinski načelnik Ibro Berilo.

Ovom prilikom napomenut ćemo da je i humanitarna organizacija "Merhamet" MDD Regionalni odbor Sarajevo i Osnovni odbor Trnovo u toku mjeseca ramazana organizovala, također, jedan kolektivni iftar za povratnike u naseljima Trnova RS. Arnela Pozder sekretar ove organizacije za Trnovo, koja je učestvovala i u raspodjeli Općinskih iftara, kazala kako "Merhamet" tokom mjeseca posta angažira sve svoje ljudske i tehničke kapacitete kako bi se stiglo do svakoga.



Centrotrans uspostavio minibuske linije u Trnovu


Linije minibuskog saobraćaja u Trnovu dugo nisu bile u funkciji na nezadovoljstvo mnogih građana općine, a oni najugroženiji su učenici osnovnih i srednjih škola, studenti i penzioneri koji nisu u mogućnosti obavljati vlastite svakodnevne obaveze. U oktobru mjesecu protekle godine pokrenuta je procedura izbora prevoznika na linijama za koje je doneseno rješenje o brisanju iz registra redova vožnje. Na raspisani oglas javila se firma Centrotrans, za koju je konstatovano da posjeduje sve potrebne dokumente i kapacitete za održavanje ovih linija. Kako saznajemo iz kompanije Centrotrans linije su ponovo uspostavljene što znači podizanje kvaliteta života građana Trnova.

Naime, u skladu sa odobrenjem Ministarstva saobraćaja Kantona Sarajevo, Centrotrans je počeo sa redovnim održavanjem linija. One će saobraćati radnim danom i subotom prema redu vožnje. "Nakon brojnih pohvala od strane putnika na kvalitet i način održavanja, na do sada odobrenim i uspostavljenim autobuskim linijama, kompanija Centrotrans ovim činom iskazuje spremnost da i dalje nastavi pružati usluge u javnom gradsko – prigradskom prijevozu u Kantunu Sarajevo", saopćeno je iz kompanije.



Smotra folklora u Javorovom dolu

U organizaciji Kulturno-umjetničkog društva "Biseri Bjelašnice, u julu mjesecu 2019. godine, održana je tradicionalna smotra folklora. Igre i narodne nošnje oživili su amfiteatar Javorovog Dola gdje je upriličen defile. Osim domaćina sa svoje tri grupe predstavilo se još nekoliko folklornih društava. Manifestaciju je otvorio predsjednik KUD-a Biseri Bjelašnice, Salem Lučkin, a kratko se obratio i Općinski načelnik kao jedan od dobitnika Zahvalnice za doprinos u radu ovog društva, te je u svom obraćanju istakao značaj ove manifestacije, kazavši da je važna najprije za očuvanje historije ovog područja ali i širenje suradnje, uspostavljanje novih prijateljstava, afirmaciju kulture i tradicije i poticanje zanimanja domaće i svjetske javnosti za bogatstvo tradicijske kulturne baštine i historije ovog mjesta. Ciljevi organiziranja smotre folklora pod nazivom "Bjelašničke staze" je očuvanje i promoviranje tradicije koja zauzima značajno mjesto u kulturi i turizmu. Spoj kulture i turizma svakako će utjecati na poboljšanje i obogaćivanje turističke ponude navedenih destinacija. Lokalna zajednica je prepoznala značaj ovog događaja u smislu što bolje promocije Trnova, turizma i kulture ovog područja te je finansirala ovaj događaj. Tradicijska kultura jedan je od bitnih i prepoznatljivih elemenata Trnovskog kulturnog identiteta. Mnogobrojni prisutni su uživali u programu. Publika je dugotrajnim aplauzima davala podršku svim učesnicima.



Biseri Bjelašnice nastupili na Festivalu u Turskoj

Folklorni ansambl Biseri Bjelašnice iz Trnova učestvovali su na Međunarodnom festivalu folklora u turskom gradu Bursi. Učestvovalo je deset kulturno-umjetničkih društava, a trnovski folkloristi ubilježili su više nastupa. Predvodio ih je umjetnički rukovodilac, predsjednik društva Salem Lučkin.

Bila je ovo osma godina zaredom kako učestvujemo na ovom pozantom međunarodnom festivalu, jednom od najvećih koje smo do sada posjetili. Predstavili smo se na odličan način, prikazali bogatstvo kulture i tradicije naroda BiH. Veoma sam zadovoljan svim nastupima u Turskoj - kaže Lučkin.



Obezbeđena sredstva za regulaciju riječnih korita i zaštitu od poplava

Ministarstvo privrede Kantona Sarajevo je izdvojilo sredstva u iznosu od 2.768.216 KM za sufinansiranje riječnih korita i zaštitu od poplava na području Kantona Sarajevo za ovu godinu. Ovim povodom, resorni ministar Haris Bašić i direktor Zavoda za izgradnju KS Mirza Hulusić potpisali su sporazume sa dogradonačelnikom Grada Sarajeva Milanom Trivićem, te načelnicima i predstavnicima općina. Kako je navedeno, Ministarstvo privrede je zajedno sa općinama usaglasilo projekte iz oblasti regulacije riječnih korita II kategorije, za koje je izrađena projektna dokumentacija, te pribavljena saglasnost i dozvole za njihovu realizaciju u 2019. godini. Nadzor nad izvođenjem radova provodit će Zavod za izgradnju KS, dok će resorno ministarstvo pratiti realizaciju ovih projekata na terenu, ali i kroz dostavljenu dokumentaciju od Zavoda i općina.



Nastavak sufinansiranja izgradnje kanalizacione i vodovodne mreže

Ministar komunalne privrede i infrastrukture Kantona Sarajevo Srđan Mandić je sa načelnicima četiri općine potpisao Sporazum o sufinansiranju projekata izgradnje i rekonstrukcije kanalizacione i vodovodne mreže.

Sporazum su potpisali načelnici općina Hadžići, Stari Grad i Novo Sarajevo, Hamdo Ejubović, Ibrahim Hadžibajrić, Nedžad Koldžo, te pomoćnik načelnika Trnova Osman Smječanin. Za Općinu Trnovo izdvojena su sredstva u iznosu do 381.118 KM, od čega za izgradnju kanalizacije u naselju Umoljani 201.000 KM, za sanaciju lokalnih vodovoda 50.000 KM, za projekte izgradnje rezervoara i dijela cjevovoda na Brdimu i Sanaciju lokalnih vodovoda 105.118 KM i 25.000 KM.



Sufinansiranje Poslovno sportskog centra Trnovo

Na prijedlog Ministarstva privrede, Vlada Kantona Sarajevo usvojila je Program raspodjele finansijskih sredstava za infrastrukturno uređenje i rješavanje imovinsko-pravnih odnosa u privrednim i poslovno industrijskim zonama Kantona Sarajevo za 2019. godinu. U Budžetu Kantona Sarajevo za ovu namjenu u prethodnoj godini planirana su sredstva u iznosu od 2.434.565 KM, od čega su 500.000 KM budžetska, 1.943.000 KM su kreditna sredstva. Prema najavama iz resornog ministarstva, naknadno će za ove namjene biti usmjereno još 500.000 KM budžetskih sredstava. Za industrijske zone u općinama KS obezbijedeno je ukupno 2,43 miliona KM, od toga samo stotinu hiljada KM biće implementirano u općini Trnovo za sufinansiranje projekata Izgradnja kišne i fekalne kanalizacije za Poslovno sportski centar Trnovo kao i za izgradnju vodovodne mreže za potrebe ovog Centra.



Plaćanje struje bez naknade za stanovnike Trnovo

Na osnovu zaključenog ugovora između Javnog preduzeća "Elektroprivreda BiH" d.d. Sarajevo i JP "BH Pošta" d.o.o. Sarajevo, korisnicima sa područja 23 općine od 1. augusta bit će omogućeno plaćanje računa za utrošenu električnu energiju bez naknade u svim poštanskim jedinicama "BH Pošte" na području tih općina. Pogodnost plaćanja struje bez naknade u poslovnicama JP "BH Pošta" odnosi se na općine: Iljaš, Ustikolina, Trnovo, Prača, Sapna, Teočak, Čelić, Kladanj, Dobojski Istok, Dobojski Jug, Žepče, Vareš, Olovo, Breza, Fojnica, Vitez, Busovača, Novi Travnik, Cazin, Bužim, Bosanski Petrovac, Jablanica i Kisieljak, saopćeno je iz JP "BH Pošta".

Osnova društva

Porodica je prirodna i osnovna društvena jedinica. U savremenom svijetu često se institucija porodice suočava sa brojnim promjenama koje su posljedica globalizacije i sve naglašenijih liberalnih težnji koji nameću nove vrijednosti i nove načine razumijevanja međuljudskih odnosa.

Nastupilo je razdoblje krize tradicionalnog poimanja porodice, što je vidljivo kroz porast stope razvoda i padu stope nataliteta. Održimo tradicionalno shvatanje porodice i povećajmo natalitet.

Nastavljena tradicija pružanja podrške mladim novovjenčanim parovima i za novorođenu djecu sa područja naše općine.

Mladi bračni parovi i mladi roditelji prema socijalnom programu Općine Trnovo dobiju jednokratnu pomoć u iznosu od 500 KM, odnosno 600 KM za svako novorođeno dijete ukoliko je prebivalište majke na području općine Trnovo.

Općina Trnovo u protekloj godini dočekala je 22 vjenčanja i na babine išla 23 puta

Općina Trnovo može se pohvaliti da već četvrtu godinu novčano stimuliše svoje članove da se udaju i žene i rađaju djecu.

Kad stigne novorođenče običaji nalažu da mu se pod jastuče ostavi novčanica, da mu se nađe u prvim danima života. Što je osoba koja pohodi dječju sobu bliža roditeljima novorođenčeta, čašćavanje, zna se, treba da bude izdašnije, pa se od amidža, daidža i tetki očekuje najviše.

Međutim, kako se iz godine u godinu rađa sve manje beba, krug onih koji časte novorođenčad se proširuje. U cilju podsticanja nataliteta, značajan iznos za rođenje djeteta nudi i općina.


- Akciju smo pokrenuli 2015.godine i najvažnije je da ih je sada mnogo više, da se broj ovih zahtjeva povećava. Činimo sve napore kao lokalna zajednica da našim stanovnicima, njihovoј djeci osiguramo što bolju budućnost i kako bi ostali u našoj općini – kaže općinski načelnik Ibro Berilo.



Vjenčanje u novoj sali Općine Trnovo - bračni par Durmo



Treskavica - Veliko jezero
Foto: Muamer Kolar



Legenda o aždaji

Bjelašničko selo Umoljani ponosno čuva Studeni potok, oazu mira i prirode, koji je nastao, kako legenda kaže, kada je aždaja pokušala progutati selo i njegove stanovnike. Aždaja je preko doline skrivene među brdima krenula prema Umoljanima. Svojim tijelom je ostavila vijugavi trag u zelenoj dolini koji je danas ispunjen kristalno čistom vodom. Mještani su pobegli na obližnje brdo, odakle su zamolili Boga da ih spasi nemani. Njihove molbe su uslišene, a aždaja je ostala skamenjena na brdu iznad doline.

Foto: Muamer Kolar